



特 別  
^18  
4892  
26



八18  
4892  
26

明詩綜卷七十七



小長蘆 朱彝尊 錄

海昌 查克建 緝評



聞啓祥 三首

啓祥字子將錢塘人萬曆壬子舉人有自娛齋

集 劉孝則云子將靈心慧解迴絕古今有不可一世之意早與名場非其好也

靜志居詩話杭州先有讀書社倡自聞孝廉子將張文學天生馮公子千秋暨餘杭三嚴後乃入于復社而登樓繼之文必六朝詩必三唐彬彬盛矣

遇澄懷閣

昔我離山居閒池點青萍今我復來茲所聞盡秋聲曾是俛仰間時物忽已更因之發長歎慨然念無生

< 2002-1107

南關署中古梅一株南宋時物也徐青壁使君邀  
看有賦

我愛西溪似西磧梅花鱗鱗照溪碧十里五里香雲迷  
千枝萬枝玉筍擘我欲因之結伴游誰知春向署中收  
花枝次第巡簷發使人忘却西溪幽展轉看花被花惱  
一樹婆娑稱獨老蒼顏鶴髮足典型縱使無花亦自好  
使君愛花兼愛客斗酒潑花應不惜醉殘明月參橫昏  
還憶西溪花正白

同穎公游西山

青龍橋外柳如烟一片西湖一帶泉恰似江南三月景  
可憐有水只無船

嚴調御 二首

調御字印持餘杭人與弟武順敕齊名有作朋  
集

秋來歎 二首

紅塵撲馬汗誰灑紅塵道人言秋雨惡我道秋雨好  
秋風以時至何草能不黃化運有恒理人心自感傷

嚴武順 一首

武順字忍公

已酉仲春訪楊兆開聞子將二兄於雲居晚眺  
共踏松蘿影雲花亂點衣低林知鳥宿疎竹見僧歸石  
冷春鶻急禽喧夜語微澄江引遙思指點片帆飛

嚴 敕 一首

敕字無敕

吾家三兄弟

吾家三兄弟酒外嗜好鮮伯子深禪機一斗法輪轉時  
時淨几上尊壘雜墳典揮毫入玄妙悉從性靈顯潦倒  
頭上巾足以傲冠冕仲也為兄難無事不盡善五齡解  
賦詩十歲老隸篆抗直飲中見幽微醉能闡意在通大  
道名韁早能斷小子無足齒然不惜沉湎勸飲猶款賓  
禦寒每廢膳覓句癖愈深種秫力能勉固乏二子才即  
此足自遣願共樂賤貧老興勿教淺

萬時華 五首

時華字茂先南昌人崇禎中徵士有澹園集 伯舒

玄云茂先姿性敦厚溫柔其于詩生而近之  
譚友夏云茂先詩如鐘鼓新晴聲聞于遠

秋日過丁氏妹簡時之

西風吹古巷驅我下澤車百鳥集喬木森森見君廬諸  
甥聞我來整履奔前除僮僕聞我來壺榼縱橫趨妹聞  
阿兄至結束臨中廚呼婢入後園擷取泥中蔬老大同  
鄉里謀生但饑飭入門共一笑內顧悲有餘寇盜滿山  
谷骨肉幸亡虞上堂古琴靜尚保先人書天命各窮達  
安樂且須臾命酒酌前軒忽已星月舒徘徊白露際天  
河淡看鬚安知鹿門翁偃蹇非良圖

歲暮田居

中歲破憂患苦爲俗所嬰詩書沿先轍且復愛斯名晨  
梳啓青鏡覽容時自驚白日照東壁素月已西楹莫疑  
造化理榮悴緣物情弱草無強蔓苦荼無甘英

曉度牛嶺

巨靈闢幽壤滂然劃茲區勢若羣兕蹲亦若千羊趨寒  
光積巖壑高厚氣有餘况疑虎豹宅或有仙人居山中  
建子月萬嶺天風俱雲雨助奇勢車馬爭盤紆鴻濛遇  
雲將靈境將焉如

送衛子建歸河東

四渡章門水歸與益黯然講依壇際杏離引曲中絃野  
色朝隨馬溪聲暮入蟬西風時念爾千里太行烟

送重熙一兄之淮陰

宿鴈分朝影章門野水邊弟兄嗟遠道離別畏中年風  
定晨開纜江寒早著絲淮陰垂釣處今古易潛然

余正垣

三首

正垣字小星南昌人有昔邪園集

十六夜舟中月

三月春方暮孤舟月又殘光寧昨夜減人向此宵看解  
照紅花瘦能增綠水寒清輝飛動處宿鳥未曾安

汝水舟中有懷茂先客金陵

澤國江濤落蕭蕭見鴈飛秋光爲客好昨夜幾人歸酒  
罷憐新月寒生識舊衣孤蓬如此寂翻笑遠游非

撥悶

下階隨意折閒花  
愛殺和風拂樹斜  
但使春光常在眼  
漫言客舍不如家

吳伯裔一首

伯裔字讓伯  
商丘人崇禎丙子舉人死于寇

長岡鎮

慘慘殺氣重  
蕭蕭悲風遞  
客行抵長岡  
席門盡晝閉  
下馬問土人  
此地難留滯  
前者開府兵  
驕悍失節制  
不戢將自焚  
養亂更加厲  
藩府賜金錢  
盡入開府第  
因之庚癸呼  
脫巾走精銳  
西來數千人  
焚掠肆狂獍  
君今坐卧地流血滿階砌

葉襄 五首

襄字聖野  
長洲儒學生

詩話吳下詩流聖野始屏鍾譚餘論嚴持科律一以唐人為師與姜孝功如須往還酬和曩嘗接席臨頓里談諧宴笑器局可親所刊吟藁考功序之今購之便不復可得  
僅從道南集鈔撮數首而已

歲暮雜感

富貴召災患  
貧賤傷飢寒  
損益會有宜  
達人庶能觀  
買臣困樵采  
伉儷難自完  
寄食邸舍中  
偃蹇資盤餐  
一朝盛榮顯  
閭里相驚歡  
勢利起爭軋  
福至禍亦干  
回思負薪日  
涕淚空沈瀾

送姜如須還萊陽

翩翩雲中鴈  
肅肅雙南翔  
落葉懷孤根  
游子思故鄉  
秋

風滌煩熱四郊生微涼車音何麟麟似為勞者傷板輿  
來東迎佳氣滿高堂相見會有期執手歡中腸

感舊

洛蜀紛爭日君王宵旰時內朝私鬪急河北捷書遲近  
輔連羣盜臨郊誓六師傷心殷浩輩一蹶竟難支

喜康小范孝廉至兼弔楊機部閣學

萬里清江浪拍天故人消息動經年重來麋鹿長洲苑  
歸去荒蕪彭澤田虎帳角殘辭部曲龍沙旗折偃戈船  
盧謏淪落劉琨死回首章門一惘然

秦穆

黃鳥歌殘恨未央可憐一夕葬三良坑儒舊是秦家事

何獨傷心怨始皇

周岐八首

岐字農父桐城人貢生有執宜集

詩話復社諸君多以文章經濟自負韻語不甚專心若桐城之方密之  
錢幼光周農父華亭之陳卧子吳江之吳日生長洲之陳玉立崑山之  
顧寧人是皆婣羣雅而繼國風者與農父貢入京師即上書宰相言時  
政得失馮公鄴仙薦之參宣督軍務隨授河南推官參陳君玄情軍復  
以按察僉事銜參史公道鄰軍晚又參楊龍友軍死于  
浙右識者比之陳琳阮瑀其詩歌雄奮亞于密之幼光

擬李陵別蘇武詩

邊聲中夜起四顧但騷屑遊子戒行期須臾遠離別攜  
手重行行悲風何慘冽與子結久要中懷時耿耿今日  
雙黃鵠一飛一摧絕欲言寄無因傷心不可說努力謝  
故人九原以為訣

明詩經卷七  
五  
詠懷

鳳皇鳴高岡豈為梁稻謀丈夫志四海豈為利名求笑  
彼田園子白首戀故丘營營井里間富貴稱殊尤烏知  
達士心一息翔九州

送豫章萬茂先秋浦劉伯宗應徵辟

擊鼓深宮中通市無不聞良玉婿重淵鬱鬱上為雲君  
子懷令譽卓犖自不羣南陽雖有田豈必老耕耘浮雲  
蔽中天白晝苦不分肉食無遠謀喻喻如聚蠶奮身出  
塵埃宜判猶與薰聖代重徵辟蒲車何紛紜網羅及吾  
黨貴之以玄纁哲人貴及時况復事明君努力長安道  
三策振奇文

經淮陰漂母祠懷古

執戟雖云卑猶勝一飯恩千金解報母蹙項不竝存韓  
侯千古傑施報何失倫丈夫重知己官爵惡足論惜哉  
重瞳子不識哀王孫

風雪夜山中偶賦

一夜北風三尺雪四壁欲穿肌欲裂孤燈黯黯爐無烟  
兩手握拳冷如鐵溪頭活水聲忽死巖下勁松枝盡折  
中宵擁被不成眠坐聽寒鷗叫荒穴

官兵行

賊近苦賊來賊至恐賊去賊來避有時賊去官兵住官  
兵畏賊如虎狼但行賊後勢莫當鳴鉦擊鼓入邨里馬



索芻豆人索糧不擇雞與豚更驅牛與羊官兵得物喜  
民家失物悲語君且勿悲官兵醉後難支持東家少婦  
已被污西家兒女終夜啼但見飽掠速颺去猶能老弱  
共舖糜一旦賊兵去已遠官兵夜起催朝飯大車橐重  
小車盈路捕行人遞輸輓行至前邨計復生竟指鄉屯  
為賊營丁男殺盡丁女擄揚舠奏凱唱功成君不見賊  
去人歸猶饜食官兵所過生荆棘痛哉良民至死不為  
非無如官兵勢逼民為賊

秋閨怨

嫖姚征冀北六郡盡從軍一夜秋風至千家砧杵聞凝  
妝愁皓月寒露濕紅裙惟見遼城鴈翩翩入斷雲

阻風燕子磯登懸壁半閣

流離逢世亂特特上漁磯海水橫江湧林鳥弔樹飛因  
人辛苦慣作客姓名微分向風塵老逢迎何處歸

潘陸一首

陸字江如吳江人僑居京口

魏楚白云江如四壁蕭然而  
北海之座恒滿其論詩慷慨

謂鍾譚興而國亡  
是亦法家定案

望亭道中

西風仍細雨孤櫂暮何依古驛人家盡寒塘野篠稀浦  
鴉昏自集湖鴈近還飛鄉樹來朝見三年此路違

王猷定 三首

猷定字于一南昌人貢生有四照堂集

詩話于以詩古文詞自負對客斷斷講論每舉一事輒原其本未聽之盡心蓋兼有筆札喉舌之妙者其行書楷法亦自通神

北固

大江東北望半壁有一作下孤城古寺風烟積春濤日月生人稀知徑小帆遠覺潮平五夜招提夢三山空外行

元日雪登息柯亭

苦竹古城阿孤亭倚息柯地偏春事緩風雪怪山多

山陰早春簡朱十

春水已流漸輕鷗浴滿池梅花開也未須問柳姑祠

梁以柵一首

以柵字仲木錦衣籍江都人

送胡濤公還彭城

老友故園去清秋客思多浮雲迷古戍白日下黃河風急霜笳動天高候鴈過雲龍山下問可有舊巖阿

陳子升七首

子升字喬生南海人有中洲集

詩話喬生古詩愛仿玉臺金樓五律規摹太白浩然時有單行之句然其心慕手追者區海目也順德薛始亨同生序其詩云洪永成弘迄今天下之詩數變獨粵中猶奉先正典型自孫典籍以降代有哲匠未改曲江流風庶幾哉才術化為性情無媿作者矣此善言土風者

昔昔鹽

鴛鴦樓外烏欲棲玳瑁梁間燕吐泥月暈圓隨漢東蚌天河傾向汝南雞萬方儀態華燈出一笑橫陳翠帳低愁見曉鴻征塞北不知天將定遼西

擬作賈生適長沙詩并序

世傳賈生賦而無詩其適長沙也可無作乎漫  
用五言補之

南赴長沙路側身思雒陽我豈黃髮人用輔長沙王

越王臺

君不見越臺百尺雄城闕輦路傳遊百花發黃屋晴連  
漢塞雲青山曉挂秦時月龍川霸氣日蒼涼橫海樓船  
更渺茫北風吹散南枝鳥惟見平沙牧馬場

遊峽山

軒轅二帝子弄笛開禺陽江岸扁舟客聞鐘到上方仙  
靈今闕寂雲水空青蒼欲遣愁心去猿聲嶺外長

西樵大科峰

樵峰七十二秀出一峰尊策杖觀朝日浮瀾動海門孤  
松生鳥外片雨落山根吾欲驂鸞去憑虛望帝閭

秋江夜泛

江光楓葉動星轉客帆孤况復秋水至安知秋夜徂牛  
渚袁宏月鷗夷范蠡湖徘徊無所似空作水中鳧

種柳

池水如明鏡楊枝是細腰宅邊宜有此花外不堪飄昔  
在長楊苑因風拂灞橋西幾攀折今日撫柔條

章美一首

美字拙生吳縣儒學生

出塞曲

秋原燒不盡羽騎壓邊陲  
劔戟霜花動風沙朔氣披  
開七伐鼓龍繪八方旗  
看勒燕然石元戎實憲辭

俞而介 一首

而介字不全紹興山陰人

得朱子若舍人海鹽書聞譚禮部元孫漳南之計

同王升之作

故人經亂後五載一書來  
且喜平安在還兼涕淚開  
牆東高士宅海上伯牙臺  
不待山陽笛愁腸日幾迴

吳祖錫 一首

祖錫字佩遠一名鉏字稽田秀水人

信陵君墓

六國安危只繫君握符  
兩度抑秦軍一九幾徹函關土  
五色徐飛芒碭雲未見  
特牛陳大俎暫將醇酒酌高墳  
可憐異代留毛薛徒倚夷門到夕曛

顧 苓 一首

苓字云美吳縣人有塔影園藁

詩話云美精篆隸書予嘗過之山塘借入骨董肆中見鼎彝刀尺款識悉能誦之文從字順每歎為不可及其詩稍率易然不龍裝竟陵遺音

三月晦日過鄰家見牡丹花盡落有感題壁

經旬不出戶春去杳無迹  
偶爾造山家紅香坐狼籍  
端然國色豔委棄風雨夕  
空餘蝴蝶飛徒見莓苔積  
始知春易盡韶光真過客  
悠悠會百年白髮誰憐惜

金俊明 五首

俊明初名袞字九章後更今名字孝章吳縣儒  
學生有退量豪

詩話鄭皮三絕孝章克兼之韶年入社藉其才名乃於壬午之秋筮焦氏易林得蠱之艮愀然太息遂棄諸生兵後隱居屢市不遠蹈湖海以爲高和光同於柳下而介不可易既卒門人私謚貞孝先生平生好錄異書靡間寒暑仲子侃亦陶繼之矮屋數椽藏書滿牘皆父子手鈔本也

自君之出矣

自君之出矣離緒苦纏絲思君如機杼長是一絲牽

寄盛柯亭先生

苦憶陽湖盛夫子三年高卧釣魚磯窮來吾道有貞吉  
老去醉鄉無是非明月儘教穿戶入白鷗長許到門飛  
慚予志漫存溝壑夢想滄江未得歸

送陳孝則還雲間

握手窮塗意倍親今朝相送欲沾巾忽看柳色青春半  
愁對梅花白髮新萬事蹉跎慵更問十年辛苦竟誰陳  
同嗟漂泊干戈日別後音書莫忘頻

爲陳伯璣題黃復仲畫

山雲冉冉水悠悠樹影扶疎草亦幽鷗鷺隨波終日見  
不煩添著釣魚舟

山游即事

山脚穉翠濃作寒山腰老紅香未殘邨家徑窄樹當戶  
兒子過來妨客冠

王光承

一首

光承字玠右上海儒學生同弟烈躬耕海畔有

鎌山草堂詩集

朱朗詣云玠右詩凌空峻拔超然獨上

送人之廣南

竝馬銜杯日未曛羊城山水正愁君秋聲已入庭前樹  
客路遙尋嶺外雲溟海上連辰極動星河南去越天分  
年來莫問流人狀知有清後不可聞

王烈一首

烈字名世

送客入楚

大江南去雪紛紛回首荒臺盡白雲夢澤天寒爭夜獵  
何人鼓瑟弔湘君

陸圻三首

圻字麗京一字景宣錢塘貢生有從同集

詩話崇禎間文社四起執牛耳者婁江張吉士溥也歲辛巳吉士卒麗京東芻絮酒往會葬賦五言長律一時傳鈔以為傑作兵後賣藥長安市上其詩文采組六朝醫方酒令觸口悉成麗語稍飯冷菜捫蝨而譚相對者忘其穢也晚因史禍牽連既得釋訪詹公於丹霞精舍轉入武當為道士不知所終里人洪昇有荅友絕句君問西陵陸講山飄然一盞竟忘還乘雲或化孤飛鶴來往天台鴈宕間講山麗京別字杭有西陵十子詩麗京居其首云

夏日與修川諸子讌飲

朱陽撰令辰前綏邁行旂鼓柷遵曲渚援帶臨高樓微禽革新音紈扇改故秋幸以接芳契揆道自綢繆機忘渺衆慮情摯滌幽憂人生行胸臆百壺信酢酬壯盛日以去曷不秉燭游

舟次聞歌者

落日橫江泛白蘋同鄉停問一相親從教李尉翻新曲  
却喜何戡是舊人玉管漫吹霜月曉紅牙曾按綺筵新  
坐中不少傷心客莫唱伊涼水調頻

閨怨

何處高樓笛淒清菩薩蠻分明秋夜裏夢到玉門關

俞汝言

九首

汝言字右吉秀水儒學生有大滌山房集

詩話右吉早著名於復社即以詩古文辭擅場既棄諸生授經弟子博稽三百年典故撰有明大臣年表官閣贈謚靡不簡而有要晚著春秋平義悉取末儒苛刻之論平反解釋惜未流傳其文氣逸格高詩亦文華中有真實

詠懷

七首

芳樹辭青陽繁陰靄深沉攝衣步清宵明月照我襟朱  
卉日夜疎宿鳥翻前林徘徊弄琴瑟悵悵不成音

我遇羨門子攜手上青霄天門誅蕩蕩金闕雙峯堯其  
外種白榆其內奏仙韶卒然疾風來吹我下山椒道逢  
皇初平軒軒御雲輅抗旌朝紫京意氣何颯颯金華牧  
羊兒時來剷仙寮對我餐玉芝乘鸞吹鳳簫

總轡游蒼梧旋車太華巔玉女正愁絕散髮不成妍湘  
君古帝子涕淚何嬋聯惜哉帝王州荆棘上參天去去  
弗復留南山尋僮佺三歲未得覲滄洲耕紫烟一丸不  
可求何以制頽年

長安游俠地雒陽粉黛叢朱樓結綺疏繡帳臨春風皎

皎垂素手琅琅振絲桐一為求皇操車馬塞道中回首  
四節易凝霜凋朱容明月猶在懸白日已不東翩翩白  
馬郎揚鞭復何從

東邨宿瘤姑十五被翟章西家美羅敷二十猶蠶桑窈  
窕絕世姿終日工七襄容色豈在好逢時即為良語賤  
有餘惡處貴罔不臧紅顏坐消歇盛年何可常

玄鶴效巫步啄木有禁符之蟲亦何知嗟哉人不如營  
道慙烈性濟世無哲圖和媚巧笑言磬折徒區區詰朝  
值風波千金購一壺性命不可知反顧戀妻孥飄飄江  
湖間失志歸何塗

蜉蝣榮朝暮楚楚修衣裳木槿發朱華悅澤自生光性

命能幾時黽勉趨朝陽夸毗者誰子乘軒御飛黃高冠  
切雲霓日若營八方中路逢故人廓落如相忘被服紫  
狐裘逆笑絺綌涼豈知年歲適託體同山岡

華嚴寺同閻古古作

玉甃金繩奠九楹離宮拓跋舊西京幾經鐵馬凋戈日  
不壞毘盧舍衛城像設孰開山後地法幢猶紀大康名  
請看直北諸陵闕白草黃榆縱復橫

進艇

晴川曲曲抱沙堤岸柳依依遠近齊山色欲開疎雨外  
夕陽忽在亂峰西舟前波浪洑流駛望裏烟嵐魯樹低  
作客乘春行處好故鄉曾否息征鼙



吳 翻 一首

翻字振六吳江人翻弟有荻水遺詩

金陵

由來天塹是虛名何用千尋鐵鎖橫采石至今圍故國  
寒潮猶自打空城六朝已歎風流歇十廟徒申帶礪盟  
回首景陽遺蘆失但餘百八梵鐘聲

黃子錫 二首

子錫字復仲秀水儒學生有麗農山人遺橐

詩話復仲屣翩翩風神諧暢落筆山水絕倫晚以窮死然對客未嘗言貧也

豔曲 二首

學織九張機香羅疊舞衣輕鸞千二百風起盡翻飛

湖中並蒂蓮岸上同心苜三十六鴛鴦飛來不飛去

韓繹祖 一首

繹祖字茂貽烏程儒學生有詠性堂遺橐

訪潘江如遂登北固

百戰江山在三年羈旅仍寒潮迴鐵甕落葉掩金陵痛  
哭防人覺悲歌轉自憎孫劉一去後狼石竟誰憑

韓曾駒 二首

曾駒字人穀烏程儒學生有悟雪齋集

分蜂

帝曰咨爾蜂旌爾君臣義王生具令姿鬚眉天表異舉  
族奉為君版章有攸暨厥賦無橫征卉醴歌既醉亦有

物害侵衛身恃微智分衙應潮汐更饒攻寡計時危儻  
相失奔走不辭勤誓不附他族教忠之義備豈無孝慈  
性同居媿公藝曰衆建屏藩庶宗相維繫枝雖不欲強  
要受封建利戮力獎王室辛螫其自必慎毋效蠻觸亦  
勿學蝶媚勿如蟻附羶勿如螳奮臂天威勿輕假利器  
勿輕示翦桐作介圭蜜脾如帶礪咨爾往欽哉纘服以  
弗替

看起兒架豆棚

落日秋風後成陰且一隅但令根自固何慮蔓難圖初  
摘先羣稚分甘到老夫宗文樹雞柵此意儻相符

劉 汜 一首

汜字伯繩紹興山陰人有遜齋稿

詩話伯繩循過庭之訓鍵戶戢山之麓息交絕游子偕南昌王于一挈  
舟訪之披衣出見時手輯念臺先生遺書得觀禮經考次一編首夏小  
正而附月令帝王所以治曆明時也次丹書而附王制正己以正朝廷  
百官萬民也於是原禮之所由起而次禮運焉推禮之行於事而次禮  
器焉驗樂之所以成而次樂記焉然後述孔子之言次哀公問次燕居  
間居坊記表記爾乃設為祀典次以祭法祭義祭統大傳施於喪葬次  
以喪大記喪服小記雜記申以曾子問檀弓各喪問喪終之間傳三年  
問喪服四制而喪禮無遺矣君子常服深衣雅歌投壺不可不講也則  
次以深衣投壺男女冠笄昏姻所有事也則次以冠義昏義推而鄉飲  
酒義射義燕義聘義合三十篇謂之經禮別分曲禮少儀內則玉藻文  
王世子學記七篇謂之曲禮蓋皆本念臺先生之意而伯繩終身從事  
此書既而伯繩奄逝其子茂林始克成之是書猶未布諸通邑大都爰  
撮其略於此

山齋自警

迷鳥不擇林渴馬不擇泉恒情此汲汲志士獨未然盜  
泉豈偏濁惡木非不繇君子惡其名豈為乾餱愆箕陰

明詩卷之十一  
遜許由夷叔卧西山雖然跡艱苦素志不可遷人誰無  
此志我獨被牽躔老大嗟何及誠之貴當年

祁鴻孫 一首

鴻孫字奕遠紹興山陰人

懊儂歌

歡從石城來幾日到襄陽亮無新艾納那不思故香

馮

融 一首

融字首川仁和儒學生有杞閣集

杞閣感懷

鳴鳥必求友好花自迎春吾廬二仲外相問無雜賓結  
契託禽魚種花共比鄰我亦斯人徒豈云遺世塵且與

援鶴侶遠此風波民

李

寅 二首

寅字寅生又字曉令嘉興縣學生有視彼亭詩  
存

桑墟鎮

日色纔過午行裝且暫停人家隔岸少魚鱗滿河腥水  
漲難通騎邨虛易數星回看昨來路歷歷遠山青

雲陽道中初見楊花

雨餘山氣夕陽銜柳絮濛濛逐去帆有客江潭怨飄泊  
東風莫遣到征衫

金

鏡 一首

鏡字金心長興人

思婦

簾卷西山暮蕭蕭人倚樓寒雲遮遠道昨夢到伊州白  
鴈橫空度銀河直北流藁砧消息斷心折大刀頭

侯

泓

六首

泓字研德後更名涵字中德蘇州嘉定縣學生

鄉黨私謚貞憲先生有掌亭集

詩話貞憲論文以孟子為宗其略曰讀孟子而悅然悟其所以為文者  
然後知事理象數變易吾前莫非是物引而出之汨汨乎其來浩浩乎  
其不可窮奇正隱顯起伏開闔隨吾意之卷舒而未有壅遏是故吾無  
常師能驅使古人而不受古人驅使斯得矣論詩期本之自得苟自得  
之師心可也法古可也錢唐陸麗京稱其述作勃  
然若鞭雷霆沛然若決江河為同調所賞若是

長歌行

玉衡無停晷青春正良期東風吹城郭草木從華滋園  
中有嘉樹蕭疎揚古枝枯苑豈不異令德貴知時庶幾  
及秋節望君凋落遲爛彼西隕日晨興復東馳努力在  
歲晚撫物無傷悲

雜咏

二首

丹山無安穴天路未可攀鸞鷲夫何為來巢碧城端城  
中有佳人愛其五彩翰飼以翠竹實餽以金琅玕感君  
飲啄惠但恐毛羽單託足未得所徒令心紆煩何如寄  
生木枝葉離以繁

微步空堂上秋氣瑟已深飄風未及起飛藿在中林宛  
宛流螢火嫋嫋羅衣襟萋萋碧蘿影泫泫清露侵歷歷

盼睐間忽忽成古今  
深心怨急節唯君懷寸陰

烏江項羽廟

百戰名徒烈千秋  
祀不桃滄江沉霸氣  
餘恨咽寒潮  
香火靈風襲丹青  
古屋彫只今豐沛地  
祠廟并蕭蕭

揚州

五月江城江水深  
蕪城斜日獨披襟  
關河輪輓交南北  
樓閣烟花自古今  
佳節未移鄉國興  
薄游還媿故人心  
十年蔓草梅花嶺  
手把蒲葵淚不禁

秋懷

蘄王臺畔草蕭蕭  
白埕清江立野樵  
異代魚龍塵跡盡  
十年霜露客顏凋  
乾坤已覺行歌隘  
戰伐時聞野哭遙

父老未忘陵谷變  
陌頭猶話建炎朝

時所居為蘄王故壘

張 雋 一首

雋字非仲蘇州府學生有西廬集

讀白太傅集

讀罷香山半格詩  
恰逢衰菊墜秋池  
鄧魴見喜唐衢泣  
此意元劉或未知

鍾嶽立 一首

嶽立字宣遠秀水縣學生有信志堂稿

秋涇晚發

落日片帆輕春江一望平  
微風三十里已度射襄城  
岸垂楊接邨邨布穀鳴  
不愁明發雨魚尾斷霞生

未茂暉

八首

慈谿王治暉填諱

先君字子若萬曆末補秀水縣學生天啓五年  
九月承祖蔭授中書科中書舍人有晦在先生

集

胡孝轅云子若詩文以割賊為深恥前有歷下瑯琊後有公安竟陵要不屑降心相附觀其鑄詞鍊句意匠經營直欲踞昌黎眉山之席 陳則梁云子若詩不棘不舒有節有度文雖用事過多若出胸臆至於書記翩翩纏綿悱惻方今之劉穆之朱齡石也 金龍友云先生近體不屑猶人故間作硬語澀體 長歌亦然五古典核讀之恒苦其盡

登高丘而望遠海

吾登高丘思與仙人游吾望遠海仙人又安在祖龍既  
陟爰有漢皇采藥神山使者相望君不見驪山陵楚王  
開後牧豎登君不見茂陵客廢穴今多礪劔石吾登高  
丘吾望遠海思與仙人游仙人安在

崇禎戊辰湖上觀毀逆奄祠紀事

先王定羣祀舊典猶可詢功宗紀自周大享配有殷或以勞定國或法施于民或捍大災患勤事喪厥身非此族不與議禮恒諄諄亦惟身後然未聞存者均于公縣獄吏創祠東海濱王堂莅巴郡任延守九真繼此廣都辜義復有安陽荀勉比於甘棠愛但許末俗循云何承平日壞法自朝紳悉索民膏脂獻媚一寺人始由節使潘汝楨建祠西湖濬嘉名錫普德過者莫敢瞋羣小齊効尤違惜耗金銀初時自吳楚漸乃徧晉秦迢迢極關塞各各逞斧斤高官及大帥將作何紛綸經營擬宮室究度侈堂陳或為九楹殿升降雕采鱗或分門三塗夥

頤闢層闈或樹一丈碑褒頌滿堅珉黃金滲厥像丹漆  
塗其脣青絲綰倭髻茉莉花斬新僉呼九千歲拜手稽  
首頻爰有陸上舍萬齡跣犬吠狺狺孔子作春秋魯史  
蓋有因誅一少正卯不足懼亂臣豈若頒要典其言醇  
乎醇東林宜顯戮以仁殺不仁是誠上公德至聖亦至  
神允宜瞽宗祀俎豆垂千春邪說雖未遂聞之嚼齒斷  
恨乏斬馬劍斷頭擢其筋慙皇忽徂落我后新政勤爰  
書別六等國法崇朝伸縱有百乾兒安能贖其親我來  
泊湖曲詔下交懽忻一夫為之倡童叟咸來臻碧瓦碎  
作礫画棟摧作薪刀剗斧頭秃土盜鯨壤堙成之累歲  
月毀之不終晨世間快意事敗謀在逡巡除惡莫若盡

古訓信可遵白日重光昭平湖自漣淪長留關與岳終

古配明禋

詩話先君作此詩時年三十有一先是河南道御史廣州梁夢環羅織朝士之不附己者先大父曾官工部營繕主事以先太傅喪奔回籍尚未起復夢環誣奏下法司提問會思陵御極先大父入都上疏自訟獲免西湖毀祠之日正先君憂患之餘也逆祠之建始浙江巡撫桐城潘汝楨擇地於關壯繆岳忠武雙廟之間祠成聞于朝賜額曰普德由是封疆大吏尤而效之清苑閻鳴泰巡撫順天總督薊遼保定軍務於所部建魏瑞祠七所天津則巡撫永城黃運泰長蘆則御史合肥龔萃肅薊州則巡撫杞縣劉詒保定則巡撫代州張鳳翼房山則部曹何宗聖蘆溝橋則工部主事臨川曾國楨宣府則巡撫蒙陰秦士文南直隸蘇州則巡撫遂安毛一鷺巡按蘄州王珙揚州則巡撫鹽御史藁城許其孝巡按莆田宋楨漢淮安則總督漕運戶部尚書維縣郭尚友徽州則知府祁縣顧鵬應天則指揮李之才山東濟寧則總督河道工部尚書南樂李從心德州則巡撫潁川李精白登州則巡撫榮河李嵩山西大同則巡撫魏縣王點代州五臺山則總督閩中張樸巡撫興州曹爾楨巡按臨邑劉弘光河東則巡鹽御史縉雲李燦然河南開封則巡撫大名郭增光巡按餘姚鮑奇謨參政海寧周鏘祥符知縣泰興季寓庸陝西延綏則巡撫萊蕪朱童蒙固原則巡撫武定史永安湖廣武昌則巡撫慈谿姚宗文巡按東莞溫奉謨至都城內外建祠尤多勳臣則保定侯

明詩餘卷之七  
梁世勛博平侯郭振明武清侯李誠銘詞臣則庶吉士大興李若琳臺  
臣則日照李蕃廬陵黃憲卿壽張王大年旌德汪若極平定張樞河間  
智鏡府尹則陽城李春茂餘若主事張化愚上林監丞張永祚爭先營  
建六街九衢祠宇相望有建于內城東街者工部郎餘姚葉憲祖私曰  
此天子幸辟雍馳道也駕出土偶豈能起立乎偵者以告忠賢即日削  
其籍祠以閔麗相尚瓦用琉璃像加冕服有沉檀塑者眼耳口鼻手足  
宛轉一如生人賜腑則以金玉珠寶充之器空一穴簪以四時花朵其  
褒頌之詞有曰至聖至神中乾坤而立極乃文乃武同日以長明每  
建一祠必以上聞閣臣輒以駢語褒答尤悖逆者國子監生陸萬齡以  
忠賢頌要典比于孔子作春秋忠賢殺楊左周魏諸公比于孔子誅少  
正卯請建祠國學之右與先聖並尊會慈皇帝晏駕乃止而江西巡撫  
益都楊邦憲毀周程朱三賢祠兼奪澹臺子羽祠碎其像於思陵即作  
之初仍疏請建魏逆祠思陵閣之微笑忠賢乃具疏佯辭帝輒覽允及  
忠賢誅諸祠悉為士民所毀凡建祠者盡入逆案額名可紀者有永思  
感恩祝恩瞻恩普德彰德顯德懷德昭德茂德戴德瞻德崇功報功元  
功旌功懷仁崇仁隆仁崇勳茂勳表勳德馨鴻惠隆禧其餘難以悉數  
矣先君好博覽經史之外諸子百家靡不兼綜性樂取友海內文士  
嘉禾者必盡款而古文辭源本六藝韻語不屑蹈襲前人尺牘日可百  
函華亭周勒自嘗云讀書能化臭腐為神奇惟禾中朱子若有其法所  
輯禹貢補注徐孝廉閻公謂當與程泰之傳同叔並垂復社第一集同  
盟奉為倫魁中西以後遞荒謝客  
晚歲失明猶命童子誦書不輟云

方池

方池不種荷亦少蒲菡萏惟有梓樹花紛紛落紅糝風  
波永生寸心默相感

移居百可園即事 二首

十畝牆東地新編六枳籬上番移竹便辰日種瓜宜穉  
子解行藥鄰翁邀撰著忽聞蜃樓見策杖往觀遲  
梓樹層陰合葦牆一徑穿亭開三面水地占十弓田書  
籍雖亡矣犁鋤幸有焉晨朝鼠姑放並坐許銜蟬

哭譚禮部元孩

去日乘桴易歸愁度嶺艱河山成死別兒女覲生還劍  
氣沉三島文星隕百蠻旅魂招不得何處望鄉關



張王府舊基

幾日西風起依然菜葉黃月明沙岸闊翻似白駒場

虎山橋

霽雪東西崦寒雲上下沙何人吹玉笛早有落梅花

明詩綜卷七十七

明詩綜卷七十八

小長蘆 朱彝尊 錄

廣陵 楊文鐸 緝評

錢秉鐙 三十首

秉鐙字幼光桐城人後更名澄之字飲光有藏

山閣橐田間集

靜志居詩話幼光禁罔潛蹤麻糍間道或出或處或嘿或語詩屢變而不窮要其流派深得香山劔南之神髓而融會之牧齋尚書錄其作入吾彙集蓋深取之矣昔賢評陶元亮詩云心存忠義地處閑逸情真景真事真意真田間一集庶幾其近之

效淵明飲酒詩 四首

寄生大塊中何者為我故譬如逆旅物暫有安足據在世雖百年畢竟舍之去臨去豈不戀戀亦不得住所以

達觀人澹然隨所遇委順生死間不厭亦不慕日飲一杯酒可以全此趣

宣聖防酒困周易凜濡首但云不知極其辭亦無咎大哉二聖人未嘗斷我酒如何學佛人不許杯入手還言破此戒諸戒亦難守我心任自然本無戒可受方其酣醉時虛空一何有試問學人心有能如此否

芸芸萬物化各各復其根其根果何有出入豈有門昔人推太極無乃荒唐言吾生本無受沒去亦無存于中何所見而辨明與昏不如隨衆人與之同渾渾

人生求有道仁義固其端吾不知仁義惟求心所安仲尼困陳蔡微服亦不難登壇却萊夷鋒刃還相干豈不惜軀命道在志以殫吁嗟保身語徒爲後世寬

田園雜詩 九首

夙昔慕躬耕所樂山澤居憂患驅我遠常恐此志虛十載一言歸舊宅已焚如嗟我昆與弟茅茨倚廢墟徘徊靡所栖還結田中廬結廬雖不廣牀席容有餘牀上何所有一二古人書熒熒陂上麥青青畦間蔬日入開我卷日出把我鋤

仲春邁時雨旣雨旋亦晴百草吐生意衆鳥喧新聲紛紛群動出各各有其營孰是形骸具而懷安居情老農憫我拙解輒爲我耕教以駕馭法使我牛肯行置酒謝老農願言俟秋成

一春勤稼穡草木荒東園今晨始芟刈逝將除其根良  
苗常恐短惡草常苦繁腰斧伐荆棘用以衛籬藩荆棘  
傷我手淋漓手中痕手傷不足道籬弱何以存家人挈  
酒至滿斟在瓦盆勸我飲一醉頽然卧前軒前軒無人  
來春風開我門

雞鳴識夜旦鳥鳴識天時東皋人語語我起毋乃遲攬  
衣出門早且復驅其兒黃犢初教成我鋤子則犁犁鋤  
豈不苦衣食道在茲道苟一老父顰蹙前致辭言兒筋  
力薄稼穡非所宜詩書世所輕猶是祖父遺如何舍素  
業自甘辛苦為多謝老父意此意君未知呼兒且飯牛  
吾去燒東菑

東園有嘉樹開花照昏曉一為葛藟縈遂使枝條槁枝  
條既已盡葛藟縈未了我欲解其纏轆轤死相抱念此  
不能除斬斷乃為好斬藤樹亦傷藤去樹以保今晨心  
目曠宿穢淨如埽樂哉嘉樹柯且復惜其老寄言種樹  
人此物去宜早

鄰舍有老叟念我終歲勞日中挈壺榼餉我于南皋釋  
耒就草坐斟壺盡濁醪老叟自喜飲三杯興亦豪縱談  
三國事大罵孫與曹呂蒙尤切齒恨不揮以刀惜哉諸  
葛亮六出計猶高身殞功不就言之氣鬱陶持杯進叟  
酒酒盡且鋪糟此是異代憤叟毋太牢騷

屋上春鳩鳴田家穀始播時雨催我還倚鐮簷前坐牧

田言錄卷之六  
童去未歸雨聲聽漸大時雨豈不嘉所慮老牛餓自往  
喚牧童牽牛入闌卧我牛既以來我鍤行須荷田疇及  
時治况復雨初過亦知冒雨寒為農焉敢惰

春天不久晴衣垢及時澣身上何所著弊襦及罽短家  
人念我寒一杯為斟滿酒滿不可多農事不可緩奮身  
田野間襟帶忽以散迺知四體勤無衣亦自煖君看狐  
貉温轉使腰肢嬾

東家事詩書西舍勤稼穡本意在謀生所期各有得君  
看田舍翁男耕女能織娶婦既以勤生子又得力焉知  
翁室豐今年大召客割雞秋極肥出酒濃如漆可憐東  
家子終歲不飽食夜愁兒女啼晝愁租賦逼天寒四壁  
空相見無顏色從此誠子孫決志耕不惑

夏日田家作

民生食為本要在四體勤盛夏豈不暘良苗獨欣欣我  
苗既以長我草亦以耘南邨稻何早今晨已食新我飢  
焉足慮且復乞諸鄰新米飯極香炊以召所親田家何  
所名勞我作苦人汎汎水中菜潑潑池中鱗雖無酒肉  
味一飽忘吾貧

述懷

五月井水寒十月井水温陰陽潛變易智者窺其根而  
况氣候移一往不復存古人有陳迹每為後世翻如何  
章甫儒猶守聖人言草木戀故株人心懷舊恩不如候

旦烏能知朝與昏大運既以然吾道安足論

贈胡處士星卿

惟我與夫子同為學道人我亦無深嗜不能甘子貧昔  
為帝室戚今為隴畝民抱腹聽鳴雞長夜不肯晨兒女  
終歲飢啼號動四鄰故人貽斗米持以分所親哀哉此  
高士不能營其身

雪朝偶成

林雀不聞譁竹牕旋已曙攬衣啓柴門藹藹見積素孤  
烟弱不高野田微有路土畦高下白皓若宿羣鷺寒花  
裏不舒麥色萋以布何處一聲喧驚此山鳥去

夏日雨後

好雨從風至炎蒸一以清雷聲驅漸遠雲氣斷猶行蟬  
極楊林噪蛙矜草露鳴同時遭汝聒聽去各為情

既望汎舟酒盡索飲鄰人

澄湖秋後闊還汎昨宵船興好樽先盡雲開月尚圓擬  
尋邨店酒空攪俗翁眠淼淼浩歌去青山絕可憐

水仙 二首

莖葉盈畦短根菱與石宜素華疑雪片絕豔是冰姿影  
在燈前好香惟夢醒知神清誰得似姑射耐寒時

千葉殊濃豔

宋人以千葉為真水仙

吾憐六瓣單香中稱澹妙花裏最

清寒白映湘妃佩黃加道士冠常防酒氣逼不敢醉時  
看

移居南邨

租得橋西宅欹斜只兩間牕平秋後草榻對雨中山賓  
客應難到吾人不易閒雙扉臨市井無事晝常關

獲稻

今年秋較稔隴稻一時黃得暇先完廩占晴早築場雞  
豚開柵喜婦子合邨忙即擬輸官稅寧期卒歲糧

葺茅

農隙爭乘屋秋晴趁好天葉紅堆處爛蘿碧補時牽免  
濕齋厨火期安雨夜眠家人思換瓦此志慰何年

寄彭孔哲刺史

梧州城踞夾江沱亂後因君得再過津市烟銷殘竹瓦

山樓月落起蠻歌飲除氷井泉源少候近桃花瘴癘多  
嶺路漸通人漸散獨留高寺老頭陀

曼公為僧挂錫雲蓋寺

金陵即事

秋山無樹故峻嶒幾度支筇未忍登荒路行愁逢匹馬  
舊交老漸變高僧鐘樓自吼南朝寺佛塋還然半夜燈  
莫向雨花臺北望寒雲黯澹是鍾陵

五月江邨即景

長夏江邨未寂寥莊家麥酒動相招湖田水足嫌多雨  
草閣宵寒怕長潮穉子采荷包雀鷁居人下食引魚苗  
山邊早稻看將出屈指嘗新一月遙

朱子葆別去有懷

嘉禾亂後信全稀忽過南邨叩板扉笑汝纔完婚嫁債  
勸余莫著水田衣雨淹塢寺花無賴潮退湖鄉蟹正肥  
去日行裝知掠奪丹陽何計買舟歸

重過沈聖符邨居

涕淚驚看雙鬢存吹簫猶是舊王孫橋邊雨過初無路  
宅後人稀早閉門古樹悲風鳴絳葉空邨白晝易黃昏  
三更鬼哭多相識腸斷誰招澤畔魂

秋興

記憶雷峰日向低停橈多在斷橋西淺沙紫蟹銜霜出  
高樹玄蟬抱雨啼度曲夜浮青雀舫吹簫人壓綠楊隄  
可憐歌舞隨烟散愁對吳山聽馬嘶

顧絳 二十二首

絳字寧人崑山人後更名炎武有亭林詩集

詩話寧人早年入復社與同邑歸莊齊名兩人皆耿介不混俗鄉人有  
歸奇顧怪之目兵後盡鬻其產寄居章丘別治田舍久而為土人攘奪  
乃又遷于山西營書院一區盡取家中所藏十四經二十一史暨明累  
朝寶錄插籤于架予嘗分書題其柱云入則孝出則弟守先王之道以  
待後學誦其詩讀其書友天下之士尚論古人然僑居日少暇輒周覽  
山川考古今治亂之迹證以金石銘碣著書盈篋其卷帙最夥富者肇  
域志也寧人沒後遺書悉為弟子吳江潘耒刊行獨肇域志散佚良可  
惋惜詩無長語事必精當詞必古雅抒山長老所云清景當中天地秋  
色庶幾似之

孝陵圖四十韻

鍾山白草枯冬月蒸宿霧十里無立樞岡阜但迴互寶  
城獨青青日色上霜露殿門達明樓周遭尚完固其外  
有穹碑巍然當御路文自成祖為千年繫明祚侍衛八

石人祇肅候靈輅下列石獸六森然象鹵簿自馬至師  
子兩兩相比附中間特萃律有二擎天柱排立榛莽中  
凡此皆尚具又有神烈山世宗所封樹卧碑自崇禎禁  
約煩聖諭石大故不毀文字猶可句至于土木工俱已  
亡其素東陵在殿左先時懿文祔云有殿二層去門可  
百步正殿門有五天子升自阼門內廡三十左右以次  
布門外設兩廚右殿上所駐祠署并宮監羊房暨酒庫  
以至各解宇并及諸宅務東西二紅門四十五巡舖一  
一費搜尋涉目仍迷稽山後更蕭條兵牧所屯聚洞然  
見銘石崩出常王墓何代無厄蓄神聖莫能度幸茲寢  
園存皇天永呵護奄人宿其中無乃致褻汗陵衛多官  
軍殘毀法不捕伐木復撤亭上觸天地怒雷震樵夫死  
梁壓陵賊仆乃信高廟靈却立生畏怖若夫本衛官衣  
食久遺蠹及今盡流冗存兩千百戶下國蟻蝨臣一年  
再奔赴低徊持寸管能作西京賦尚慮耳目褊流傳有  
錯誤相逢虞子大獨記陵木數未得對東巡空山論掌  
故

天壽山六十韻

成祖昔定都乃省茲山陽羣山自天來勢若蛟龍翔東  
趾據盧龍西脊馳太行後尻坐黃花前面臨神京中有  
萬年宅名曰康家莊可容百萬人豁然開明堂維時將  
作臣奉旨趨傍傍盛德比霸杜宏規軼灑邛雷電驅玄



冥白雲升帝鄉三光墜榆木窮北回輶輶駢馳金粟堆  
寂寞橋山藏右獻左次景裕茂迤西旁泰陵在茂西稍  
折南維康永陵在東南規模特恢張礮石為玄墀丹青  
煥雕梁昭近九龍池定依昭左方其制亦如永工麗踰  
孝長慶居獻西隅德奠永東岡環山數十里松柏參天  
蒼列宗每駕朝百執恒趨蹌一年祭三舉侍從來班揚  
詩追安世歌典與郊禘先天禍降宗國滅我聖哲王渴  
葬池水南靈宮迫妃殤上無寶城制周帀唯塼牆下有  
中涓墳陪葬義所當殿上列三主妃栗帝后桑田貴妃主  
崇禎間所  
立帝后主則昌  
平州民立也問此何代禮哽咽不可詳麥飯提一簞棗榛  
提一筐邨酒與山蔬一一自攜將下階拜稽首出涕雙

浪浪重上諸陵間裴回復彷徨茂陵樹千株獨立不受  
戕門闔尚完具上頭安御牀自康以接慶小樹多榆枋  
殿樓盡黃瓦透迤各相望康昭二明樓並遭劫火亡定  
陵毀大殿以及東西廊餘陵半無門累甃仍支采尚存  
宰牲亭暨外諸監房石人十有二袍笏兼戎裝六獸柱  
則四制與鍾山亢跨以七孔橋峙以白石坊仁宗所製  
碑嵩翠當中央行宮已頽壞御路徒荒涼每陵二太監  
猶有稱司香人給地數畝把耒耕山場春秋祭碑下共  
用一豕羊皆云牧騎來斫伐尤披猖并力與之爭僅得  
保界疆有盜貴妃冢斬首竿以槍於時姦宄民瞿然始  
懲創繞陵凡六口六口各有兵一陵立一衛衛設屯與

倉居庸有總兵昌平有侍郎一朝盡散迸無復陵京防  
燕山自峩峩沙河自湯湯皇天自高高后土自芒芒哭  
帝帝不聞籲天天靡常誰充八陵使陳辭申此章

北嶽祠

曲陽古名邦今日稱下縣嶽祠在其中魏峩奉神殿體  
制匹岱宗經營自雍汴鶴駕下層霄宸香閉深院睽賜  
鬼目獰盤蹙松根轉白石睇穹文丹楹仰流絢肇典在  
有虞望秩羣神徧時巡歲即暮歸格牲斯薦自此沿百  
王彬彬著紀傳恒山跨北極自古無封禪賴以鎮華戎  
帝王得南面河朔多彊梁燕雲屢征戰赫赫我陽庚區  
分入邦甸告祈無闕事降福蒙深眷周封喬嶽柔禹別

高山真疆吏少干城神州恣奔踐祠同宋社亡

時嶽祀移  
渾源州

祭卜伊川變再拜出廟門嗚呼淚如霰

樓桑廟

大雪閉河山停驂阻燕界日出見平岡廟制頗宏大昭  
烈南面尊其旁兩侯配陰森宮前木蕪沒畦首菜遺像  
纏風塵荒碑委榛薊痛惟初平時中原已橫潰跳身向  
荆益歷險誠不悔終焉嗣漢業上帝居裡類獨此幽并  
區頻在衣冠外不得比南陽何由望豐沛尚想舊宅桑  
童童狀車蓋黃屋旣飄飄霓旌亦杳靄惟有異代臣過  
瞻常再拜不及二將軍提戈當一隊

嘗熟縣耿侯橋水利書

神廟之中在天下方全盛其時多賢侯精心在農政耿  
侯天才高尤辨水土性縣北枕大江東下滄溟勁水利  
久不修累歲煩雩禱疏鑿賴侯勤指顧川原定百室滿  
倉箱子女時昏聘洋洋河渠議欲垂來者聽自非經界  
明民業安得靜願作勸農官巡行比陳靖畎澮遍中原  
粒食詒百姓

贈人

楊朱見路歧泣然涕沾臆路旁多行人一南一以北南  
北遂分手去去焉所極南指越裳山北適羶裘國同在  
天地間合并安可得此去道路長哀哉各努力

寄江南友人

自昔遘難初城邑遭屠割幾同趙卒坑獨此一人活既  
偷須臾生詎敢辭播越十年四五遷今復客天末田園  
已侵并書卷亦剽奪尚虞陷微文雉羅不自脫却喜對  
山川壯懷稍開豁秉心在忠信持身類迂闊朋友多相  
憐此志貫窮達雖鄰河伯居未肯求吻沫出國每徒行  
花時猶衣褐以此報知交無爲久惻怛

邢州

太行從西來勢如常山蛇邢洺在其間控壓連九河唐  
人守昭義桀鷲不敢過憑此制山東腹心實非他事已  
溯悲風芒然吹黃沙乞食向野人從之問桑麻

述古

六經之所傳訓詁為之祖仲尼貴多聞漢人猶近古禮  
器與聲容習之疑可睹大哉鄭康成探蹟靡不舉六藝  
既該通百家亦兼取至今三禮存其學非小補後代尚  
清談土苴斥鄒魯哆口論性道捫籥同矇瞽

夏日

首夏多恒風塵霾蔽昏旦舞雩告山川白紙催州縣未  
省答天心且忘除民患黍苗不作歌碩鼠徒興歎仗馬  
適一鳴身名已塗炭貝玉方盈朝此曹何所憚博士有  
正先實趣秦時亂

過短亭拜李先生墓

人生無賢愚大節本所共蹉跎一失身豈不負弦誦卓

哉李先生九流稱博綜心鄙馬季常不作西第頌屏居  
向郊洞食淡常屢空清修比范丹聰記如應奉力學不  
求聞終焉老家術同時程中丞一疏亦驚眾玉璽安足

陳亟進名臣用

中丞名紹德州左衛人巡撫河南時漳河旁得玉璽上疏  
言秦璽不足珍國家以賢為寶焉當籍諸臣十餘人不納

遂謝  
病歸

掌論正紛拏中朝竝器訟世推山東豪三李尤放

縱祠奄與哭典後先相伯仲初踰士類閑竟折邦家棟  
悲哉五十年風塵尚瀕洞我來拜遺阡增此儒林重雖  
無聲欬接猶有風流送自非隨武賢九原誰與從

歲暮

平生慕古人立志固難滿自覺分寸長用之終已短良  
友日零落悽悽獨無伴流離三十年苟且圖飽煖壯歲

尚無聞及今益樗散治蜀想武侯匡周歎微管願一整  
頽風俗人謂迂緩孤燈照遺經雪深坐空館

得伯常中尉書却寄并示朱烈王太和二門人

岱雲東浮日西晡下有畸人事鉛槧忽來青鳥銜尺書  
月入軒櫺燈吐燄別子三年斷音問敝裘白髮空冉冉  
引領長晞函谷關停驂尚憶終南廣瀕行把酒送余去  
重來何日當分陝腐儒衰老豈所望感此深情刻琬琰  
擔簦百舍不自量可能再上三峰險君家賢甥與令嗣  
舞雩歸詠同曾點尚論千秋品竝堪以吾一日年猶忝  
期君且復慰離愁勿向流光悲荏苒

龍門

亘地黃河出開天此一門千秋憑大禹萬里下崑崙入  
廟煮蒿接臨流想像存無人書壁問倚馬日將昏

自大同至西口

二首

舊府荒城內頽垣只四門先朝曾駐蹕當日是雄藩綵  
帛連樓滿笙歌接巷簾一逢三月火誰弔國殤魂  
舊說豐州好於今號板升印鹽和菜滑桐乳入茶凝塞  
北思屠齒河東問股肱獨餘京雒叟終日戍樓憑

霍北道中懷關西諸君

苦雨淹秋節屯雲擁霍州蟲依危石響水出斷崖流驛  
路愁難進山亭悵獨留遙知關令待計日盼青牛

嵩山

位宅中央正高疑上界鄰石開曾出啓嶽降再生申老  
柏搖新翠幽花茁晚春豈知巢許窟多有濟時人

劉諫議祠

在昌平舊縣今廢

阜囊青史漫傳名白日黃泉氣未平自古國亡緣宦者  
可憐身沒尚書生荒阡草長妖狐出舊驛風寒劣馬行  
一自德陵升馭後山河祠廟總淪傾

禹陵

大禹南巡守相傳此地崩禮同虞帝陟神契鼎湖升寔  
石形模古墟宮世代仍探奇疑是穴考典或言陵玉帛  
千年會山河一氣憑御香來敕使主守付髡僧樹暗巖  
云積苔深壑雨蒸鷓鴣呼冢柏蝙蝠下祠燈餘烈猶於

越分封並祀鄞國詔明德胙人有霸圖稱望古頻搔首  
嗟今更撫膺會稽山色好悽惻獨攀登

井陘

水折通燕海山盤上趙陘權謀存史冊險絕著圖經  
瞰下如臨井憑高似建瓴壑水當路白窯火出林青  
頗憶三分國曾觀九地形秦師踰上黨齊卒戍熒庭  
獨此艱方軌於今尚固扃連恒開晉索指昂逼虞星  
乞水投孤戍炊藜舍短亭却愁時不會天地一流萍

舊滄洲

落日空城內停驂問路岐曾經看百戰唯有一狡猊

張綱孫

二十一首

綱孫一名丹字祖望錢塘人有從野堂詩集

毛馳

黃云祖望詩悲涼沉遠矯然不羣 葉聖野云秦亭詩輪囷結轆怨誰不亂有小雅之遺

詩話秦亭論詩謂少陵七律能用比興他人雖極工鍊不過賦爾以是人皆賞其七律然不若五古之波瀾老成也其南北行旅諸篇尤為奇

岷方之西陵諸子逸倫絕羣

### 古意

慘慘孟冬日北風吹林丘飛雪覆中野山雀羣啾啾佳人水一方路遠無方舟有客從東來寄書言其由一別十餘載未如意綢繆棄書溝水中水各東西流區區不識察胡用慰離憂

### 哀舊廬

朝出西郭門一步一徘徊道逢舊鄰里問予何所之子亦無所之將往北山陂五世為君鄰一朝俱遷移兄弟皆分散妻孥何所依矧復幼子亡棄置在路岐頃從家中過不知有阿誰蘭桂摧作薪空餘零露垂風雨日飄搖棟宇莓苔滋念我平生居涕淚不可揮

### 白竹邨

路盤白竹邨崎嶇探窮谷居人八九家林杪構破屋下惟四柱立亭亭不附木仰視如鳥巢夕暝梯雲宿已防虎豹害復懼麋鹿觸我行多彷徨不敢岐路哭從者勿苦饑餐松毛羽足

### 小中塢

不覺虎穴過稅駕中塢裏山樓閣溪上朝夕得所倚古

樹行蟻赤寒藤聚花紫攀厓嘯風前尋流行澗底松杪  
駐移雲竹籜落壞几潭影布游魚水氣迷香芷野後探  
蜂窠溪樵抱麋子弱蘿扶欹木崩穴藏竄雉直諧宿昔  
心避世自此始

武康縣

羣鷺起平田衆流匯大溪離離樹影出團團雲色迷我  
行防風國麻鞵踰弱泥山縣習俗古二彘五母雞尚有  
先民風桑陌陰依依日中市已過居人閉柴扉魚跳花  
下浦雉飲竹間谿及此暢懷抱恨爲俗士攜

長新店

夜半戒僕夫侵曉冒寒色出門十里餘星光漸以匿聒  
耳多悲風口禁鼻氣塞堅冰乃在鬚縮蠟改張戟少焉  
霜日升照見沙路直稍稍生暖氣面東不敢仄所苦枵  
腹行邨午未得食昨夜長新店土屋聊偃息千錢不一  
飽何以增薄力

涿州城

曉霜不在地微白生牛背遙望涿鹿城隆然沙磧內控  
縹走其下壁立皆土塊此地古范陽甲兵天下最側耳  
聞啼饑傷心自我輩野狼遇人嗥蒼鷹攫雉碎生涯底  
如此浩歎茲行邁

督亢陂

路有許善  
心故里

已過許氏里迢遞出燕關南有督亢陂沿河路迴盤四



望棗樹林霜葉亦已乾  
土闢又沃美彷彿畫圖間  
始知荆軻謀不成良足歎  
秦皇雖不死白日爲之寒  
俠烈槩千古哀哉太子丹  
再越白溝水層冰凍漫漫  
兩兒戲其上投石笑我前  
我生不如子辛苦損坐鞍  
人從土壁行鳥向平蕪還  
高陂下牛羊淺浦無波瀾  
不異故鄉適惟見暮雲殘  
臨風幾回首去去心悲酸

雒縣

我行雪霏霏亂下卷花片  
長烟蔽史邨屯雲苦雄縣  
引臂不得伸舉體時厭倦  
豁然臨大湖光曜森瀾漫  
長堤四十里却立疑中斷  
五丈一板橋百步數石岸  
白榆火不生古柳瘦已爛  
水邨繫漁舟柴扉叫沙鶴  
豈是魚君陂還向松門畔  
默默憶高堂安得附書鴈

交河

昨暮宿商陰野雞鳴不止  
僕人提煖湯推戶喚我起  
寒色不可禁下坑燒蘆葦  
乾口嚼參苓束腰插鞭弮  
乘月渡交河桂影自清洗  
不聞騎足響但聽流水駛  
日色早已白曉光初帖水  
低視衣上霜細細吹波綺

晏城

小小古晏城西對華不注  
昔之晉郤克逐馬匝此處  
我行實已嬾解鞍歇薄暮  
鳴臯嘯其羣老烏守枯樹  
不見古人迹斷碑委樵路  
手摸苔蘚痕字句讀未誤  
平仲之采地緬然起思慕  
奈何千載後蕪沒如野戍  
相望有遠

山恐是齊朝附

齊河

北河俱有名此是古濟水神禹不可作悅然疏淪理西  
連汶上波東去長山尾所存兩故道至今流瀾瀾駐馬  
野店門指顧城樓雉齊河雖下邑紛紛日中市滿篋木  
棉花傾篋雪黎子階前籠鬪雞背距利如矢風俗自可  
懷我意靡安止

石都寨

南走千餘里始登梁父山高下溪谷深石角向我攢往  
往路絕蹤竟日斷炊烟但逢逃亡人徒走流水間瘦妻  
前拄杖枯柳相攀牽弱女布裹頭兩足赤不纏見客生  
羞避忽露桃花顏小兒卧竹筐其父高挑肩行李蘆葉  
席寒暖不棄捐既無糗糧備又苦木皮乾前後跡踵至  
倦坐依沙灘告我秋大水國課不得完縣令日鞭責誰  
惜行路難去住總填壑此夕偷苟安我聞黯然悲行行  
淚如泉目慘石都寨腸斷小西關居者八九家頽牆無  
門闌招我入土室板扉坐已穿食我夏麥粥未及久熬  
煎豆牙代蕨薇荒茅當屋椽雖為困苦劇腹飽亦便便  
衆人頽倚睡我獨聽潺湲反覆思所遇不得終晏眠

泰安州

州南有泰山其勢何穹窿高高十八盤天門開西東絕  
頂無字碑秦皇昔行蹤避雨不知處尚傳大夫松當其

滅六國刈人如草叢七十二君前禪祀本有功後王無  
至德頌言反不窮我來汶陽城巖巖在目中意欲叩天  
孫上探青帝宮堆黎與散棗考此歷代封豈無虛美詞  
錫福將毋同恍惚山靈降爲我揚清風朧朧夜半色先  
開青芙蓉

新甫雄關

夜出見山火熒熒石閣岡急走新秦邑漢之東平陽迢  
迢隔泗水霜坂五里長雖然水澤涸其流還湯湯逾波  
經古道衰柳淒成行蕭蕭悲風生冢墓吹白楊石虎與  
石馬跡是尚書郎始經新甫關蹀躞崔家莊人烟濕頽  
壁饑鳥竄空梁厓脚苦不高潭水濺我裳何以慰行路

仰視天蒼蒼

路有兵部尚書王長公墓

蒙陰

夕宿敖陽邨朝行桃花溝東山八十里落月依林丘倚  
午息蒙陰野店脫敝裘土人延我坐率爾意綢繆口陳  
水簾洞上有鬼谷幽再獻雲巖茶色如白羅柔誇彼繭  
綢好紅絲信清秋艱苦養此蟲三時乃有收飢嚙榭樹  
葉渴飲清露流日出虛幔張薄暮挑燈求赤蟻恐攢害  
麻雀時啁啾土丸頻彈射風雨不得休男女賴苟活焉  
敢視悠悠我起數歎息注目清溪愁奈何三吳子錦衣  
美遨遊

西山雷院

玉泉入數里深谷俱箐箐危峰皆却立鑿壁開雷院松  
柏夾其徑仰攀藤蘿便入門瞻神像光怪非常見龍君  
被彩衣老母掣金電左右列將帥熊身兼虎面三眼冠  
兜鍪六臂持刀箭或如鳥喙形背翅如羽扇此時當檻  
揖彷彿風雷變我聞宋時帝構此丹青殿迄今五百載  
春遊每歎羨宮闕在南山灰燼無瓦片狐狸騎石馬荆  
棘布芳甸不及此遺構巍峩俯碧澗懷古正不足落日  
聊消遣

觀捕雉

曉霜照原野披襟出戶牖偶值邨中人趨走在林藪喧  
呼同捕雉張網布前後利刃斬密竹土塞深穴口草雉  
忽竄出高飛過培塿拍手隨之去已落野田右衆人爭  
合圍大索亦何有俱言暫歇息坐向墳壚守傍有空心  
樹躍出一竹狗毛如蒼鼠色突破密籬走相顧不覺笑  
不知還在否起身至溪邊亂草堆積厚低頭看草根此  
雉藏其首

苦旱行

田中無水騎馬過苗葉半黃蟲齧破五月不雨至六月  
農夫仰天淚交墮去年臘盡頻下雪父老俱言應水大  
如何三伏無片雲米價騰貴人饑餓大河之底風揚沙  
桔槔無用袖手坐林木焦殺鳥開口魴魚枯乾柳僵卧  
人人氣喘面皮黑十箇熱病死九箇安得昊天降靈雨

擊莫挾耒穀可播高田低田薄有收比里稍可完國課  
不然官吏猛如虎終朝鞭扑疇能那

彭蠡湖暮泊

孤舟暮泊吳城岸大船滿載栗樹炭連檣竝櫓不敢行  
黑夜懸燈守湖畔天明走謁睢陽廟殺雞灑血雞不叫  
千人禱祀百人出聞說南風俱失笑

山居

朝雲起山南暮雲起山北只有山中人朝暮見山色

魏壁

十首

壁字楚白慈谿人崇禎中補歸安縣學生後更名畊字白衣有息賢堂前後集

蔣馭園云魏子游意篇幅之外洋然自得不以

頌簡為度 朱伯虎云楚白五古初摹漢魏至其得手則在景純游仙  
支遁讚佛游行晉宋之間若五律純祖少陵離奇天矯難以準繩相格  
徐禎起云楚白詩得力于漢魏而沉酣于杜李二家 周壽  
士云白衣鏡意學杜晚一變而神游于謫仙之門遂升其堂與  
詩話白衣僑居吳興別鮮山為晉沈禎沈聘避地所居有渡曰息賢遂  
以名其堂其論詩云詩以達情情貴極其所至故樂必盡樂哀必盡哀  
由唐以前諸家體不必相蒙而其為至則一也學者各盡其塗徑而入  
入之愈深見其畛域愈廣恣睢淫佚于其際者久之乃始得其濔濔之  
樂故涉獵眾家不若專致一家一家之趣既竭而後馳而去之再適一  
家其於一家猶是也然後古人之長見而我之長亦見余之於詩初無  
矜飾務達其情凡博奕飲酒朋友酬酢以至山川風俗城郭之所歷覽  
遺迹之所辨證雜然前陳有觸于懷發之詠歎以為合於作不能自己  
之旨此則余之所自道已故其中年專學  
子美末年專學太白惜乎未見其止也

贈陸嘉淑

種豆南山下豈必連陌阡結交四海內豈必盛輜輶丈  
夫貴適已汎愛奚取焉昔余鍊玄液抗襟大滌山情盼  
如雲合今來期屢愆道遠日月邁苦懷慷慨言路險知

騏驥世僞知聖賢美玖示良工展翫識其然伊余頑魯  
質黽勉追不前應門閉重闈明燈曜芸軒新文遙有贈  
贈子松柏篇

戲題施孝廉画山水圖歌

湖州画山水近推施之圻公車不上嘗游戲雖然不比  
叔明與松雪秃筆橫埽殊有致淋漓磅礴生長風無有  
一筆與人同當其得意時悄然超天工兩峰劈破華嶽  
懸洪厓掌跡何歷然黃河西流白日動青柯北折紫塞  
連况忽秦漢封禪道中藏玉簡金泥篇坡陀更有長松  
樹偃蹇倒挂層樓翠高枝礙青天低枝塌大地漠漠陰  
飈六月寒森森遠島秋毫利男兒貴適真胡為落風塵

殘年憔悴戎馬際旅食慘澹江南春吾語施之圻吾有  
甬東細絹如雪白勞公細寫蓬萊方丈三神山無使大  
小九州相斷隔

醉歌行

姜大行  
筵中作

明州布衣家已傾幾載亡命乞餘生縵縷百結脚不韞  
伶仃枯槁無人形奔走東吳與西楚滿城盡是商與賈  
各自全軀保妻子搥胸何處訴愁苦今年飄泊長洲來  
性命如絲更可哀一餐飽飯襟懷好輸心寫意傾深杯  
秋雨注牆螻蛄叫菊花倒地金錢開三盞兩盞筋骨活  
將醉未醉春姿迴歡樂填填徹曉夜何知曾繳徧塵埃  
姜生姜生不須慮聖賢豪傑終荒苔人生三萬六千日

會當日日者頭開富貴于我何有哉

日出入行贈鎮江潘陸

白日如金盤迢迢轉青天夕沒虞淵朝復出苦爾獨照  
羈人顏我欲長繩繫其影誰能上結高高之青天下結  
冥冥之重泉春花吹落斷腸去秋霜蕭颯不可言我與  
汝曹日奔走茫茫赤縣疲人間才大世人皆欲殺七尺  
之軀那值錢潘江如聽我言萬古文章置高閣青蚨須  
索五十千天台瀑布插眼前潯陽酒樓宜酣眠那待好  
鞍與好馬纔指五嶽拂長鞭海上白龜橫島去倏忽已  
過三山巔金宮玉闕霄漢間直與東王西母筵

寄金俊明

燕子秋飛急野池蓮故紅江山驚歲隔衰老泣塗窮斫  
桂憐宵月緘愁屬塞鴻親朋如有問爲報耳初聾

梅里宿屠爨宅

汝髮黑如漆吾頭白可憐怱怱逢上巳袞袞話當年月  
落吳關樹春深樵李田明朝須解纜不放老夫眠

十五夜西湖舟中翫月

吾愛湖中月攬之清若空分明青嶂裏獨照白頭翁碧  
浪搖鵝鵲金笳起塞鴻蟾蜍真可戀莫畏曉來風

十六夜湖上望月

今夜西湖月仍同十五圓徘徊臨碧海依舊上青天何  
處歌鐘起誰家珠箔懸瓊瓏相望裏清嘯不成眠

漫興

八月水來沙嘴闊九月水來沙尾圓太湖漁子且莫喜  
二尺黃魚不值錢

吳理楨席上口占調朱十

冬夜開筵白玉堂春風舞罷杜秋孃情知燭下憐才子  
也遣分愁攪客腸

明詩綜卷七十八

明詩綜卷七十九

小長蘆 朱彝尊 錄

黃海 汪弘度 緝評

范路 五首

路字遵甫蘭谿布衣流寓嘉興門人私謚貞簡

先生有集

周青士云遵甫潛心性命之學不關佛氏偶然作云青

我嘗夜分坐仰天見北斗風吹百草頭月出萬山口牧雲和尚愛之欲  
付以巾拂不受海鹽張處士瑛白方講學硤石山遵甫謂其晰明德格  
物義有未安別為講義示學者人或以其未盡合乎朱子非之遵甫不  
顧也其詩不費鍛鍊而出誦之妍雅和平晚開靈蘭館賣藥長水市乍  
愚乍智人莫測其所詣云 錢爾載云遵甫孝友性成自其父徙居梅  
會里父母既沒以不得反葬蘭谿時銜恨崇禎辛巳禾中歲大飢人  
相食有族弟思攜妻子鬻身以求活遵甫留之同飯糠粃怡然不以爲  
嫌此事人所難能也遭亂賦詩云東去大海一千里赤脚踏著珊瑚枝  
足稱 警句



靜志居詩話遵甫含貞履信博通古今賣藥市門行歌帶索由其見深故於憂淺識遠斯視患浮昔人謂太丘道廣廣財不周仲舉性峻峻則少納遵甫廣不混俗峻不污物發為詩文多見道之言裴子野之稱劉居士也所修孔氏之學則儒者師之所明釋氏之教則淨行傳之所著文集則詞人錄之斯言也遵甫庶足當之矣

讀史

智伯祀已殄趙氏勢方雄士苟欲富貴匍匐歸其宮飲  
頭諒不活殺身亦何功哀哉漆身人甘以殞厥躬乃知  
國士心不與世俗同寥寥數千載誰能嗣其風

感懷

結交自童穉一朝成別離秋風吹古道露重霜葉飛留  
君苦不能從君道已違海闊波潮多山高鴻鴈稀此哀  
竟安憩庶幾君來歸

晚步

氣侵林木晚歸步自原田舊業愁中盡餘生亂後全人  
烟孤壘斷衰草夕陽連何處悲笳動依然似去年

一丘山遠望

巘岈枯木響西風獨立懸厓望不窮白浪秋高漁艇沒  
黃茅霜老野花空松門曉闢扶桑日雲漢寒飛絕塞鴻  
更欲乘虛汎天末萬山開處一孤篷

屠昭仲云此遵甫蹈海作也

春游曲

車圍繡幃馬銜鑣載取鈿箏間玉簫欲試誰家新釀好  
東風楊柳第三橋

韓洽

二十四首

洽字君望長洲人隱居羊山有寄菴詩存

詩話崇禎之際言詩於吳下吾必以君望為巨擘焉匪特高節軼羣也所撰篆學測解釋訓考源足證說文長箋之誤

猛虎行

并序

蘇郡故無虎比歲數獲虎云自宜興諸山渡湖而至擬古樂府作猛虎行

虎欲異羣虎舍山而渡湖自失嶮岨窟託身就菰蘆邨落齊戒嚴鄰保相招呼耨鉏代戈矛勇銳當先驅爪牙豈不猛其如處世孤奮鬪亦良久力盡乃告殂錦斑斃野草割剥無完膚嗟彼田舍兒曾非卞莊徒何乃百獸尊輕身死庸夫萬類固竝生所宅各有區一朝處非據適足亡爾軀持此告羣虎毋若此虎愚雄長山林中賁

育孰敢圖

野田黃雀行

每每野田廣習習雀聲微飲啄豈或異性情能不違翔集繞溝畎樂我禾稼肥禾稼雖未登西成今庶幾皤皤野田叟羸拙無俗機猜嫌兩不作相向心依依有時爭隴行先我後我飛農望甌石儲餘粒雀所希同在田中生安知是與非

躡帆行

舟之有帆檣本為順風設逆風亦張帆湖船技獨絕逆來以順用其妙在曲折峭帆必斜張左右隨所拙旋轉分寸間向背遂迴別風來雖當頭我舟顧斜掣轉側以

背承風過自後撤帆勢從風歎船舫半沒滅所恃旁版  
垂故不至橫截斜行既良久轉躄柁旋換其塗稍紆回  
其勢已飄瞥小水難迂行拘于勢狹劣大海太渺茫回  
旋恐無節惟湖既開廣諸山復眷列是法獨可行雖險  
無危艱我來包山游其事始親閱巨舟數播蕩狂濤湧  
如雪同行未習見驚悸膽欲裂我心自恬然壯觀殊可  
悅古來處橫逆濟險賴明哲遜順無力爭所志終必徹  
屈曲委蛇間大巧固若拙

沈烈女詩

婦道從一終風詩著共姜不聞在室女守節稱未亡當  
年沈氏女許字黃于庚黃郎抱羸疾十九乃上殤女聞  
哀且泣鬢髻縞素妝不復下樓梯惇惇守空房爺孃謀  
改聘投繯自捐生急救乃得蘇日夕常周防從容告阿  
女禽鳥必雙翔汝年纔十九前路正未央阿女謂慈親  
百年豈久長死爲黃氏鬼不復累爺孃意欲歸黃室守  
喪事姑嫜黃家日凋落旋復值姑喪號慟復衰麻長齋  
事空王歷載二十八世變大倉皇家人遠奔竄閉門絕  
餼糧從容死不悔全節凜冰霜黃家往迎柩同穴葬山  
岡世道日頹敗四維棄不張匪惟閨閣中窺穴而踰牆  
君臣朋友間反面殊炎涼側聞烈女風其能不慚惶以  
比較諸彼奚啻梟與凰媿彼懷二心所宜急表章雖然  
聖人道中正斯可常律之以禮經此事實可商吾家有

兄女與此正相方所字曰顧氏一門有二貞三郎聘虞女吾壻第五郎虞女聞壻死誓言不再更有母議別字墮樓幾欲僵顧家遂迎歸所志乃得償吾姪實繼之信誓由中誠二女竟同居食貧飫糟糠今將三十年高節如冰清當時壻沒後顧母來相迎女遂喪服往執禮如嫠孀余力言其非禮文明且詳六禮苟不備貞女不妄行惟茲六禮中親迎尤大綱雖聘未及娶夫婦禮未成自稱彼家婦得無過乎情太過猶不及於禮俱有妨先王制喪服恩義為權衡未嘗一識面未嘗一聞聲恩義其何居哭泣服衰裳婦人有三從在家從父兄此非父母命自專非所當女子不出梱乃登他人堂共姬不避火高節無與京猶言女不婦致惜于丘明况婦而不女安得無譏評禮言婦既娶三月見宗祊婦未廟見死歸葬女氏塋如何未娶者瀆禮相合并或言吳季札脫劍挂冢旁彼以劍許人死而猶不忘况以身許人其可負衷腸余聞無可答拜伏久屏營審思至再三請告諸貞良女身與劍異身重劍則輕器物可持贈身不可自呈同異誠較然何得相比量守節豈不賢過禮非所望割股療親疾國法垂煌煌雖不加譴責不以孝子旌貞女亦此例宜著為法程并作女史箴垂訓閨中媿余言非過刻析理誠宜精豈其毀節義鄙性亦硜硜

言懷

四首

農工與商賈是名曰四民四者雖異業皆以資其身未  
有身不謀而可以治人奈何今世士所飾空衣巾沾沾  
弄文墨垂涎要路津問之經世略棄置若浮塵達則誤  
天下窮則老且貧身世兩相誤風俗何由淳法久乃滋  
弊末師焉可循

古之兵皆農農富兵亦強古之士皆農農樸士亦良兵  
農一以分家室無餘糧士農一以分耒耜無文章待哺  
難為兵忍飢難為士分之則三傷合之則一理請告當  
塗人治亂實在此

人人知愛敬天下無賢聖人人務耕織天下無道德六  
經諸史外文字皆贅賊百家競紛紜聖教愈克塞勇哉

秦皇帝一火祛其惑

天地生我時孑然惟此躬飢渴與寒暑百患來相攻我  
無辟穀術口腹何以克又無革與毛可以禦霜風養生  
各有待資彼萬物功萬物非我有一身徒空空持此問  
彼蒼何道得不窮

宿堯峰壽聖寺寺舊名免水院

茲峰吳中秀何事乃名堯游侶為余言在昔懷襄朝下  
民苦昏墊聚族此山椒陶唐有遺風淳樸今未凋荒遠  
弗可詳登陟聊逍遙土厚石亦雄曠衍仍沃饒一巖特  
險峻絕徑凌層霄幽崖集仙靈龍洞興雲颺暝投古寺  
宿庭宇虛寥寥玉泉湛深碧飲酌心神調拂蘚讀殘碣

懷人想遺謠飢語走荒徑哀禽響寒條晨光動石壁鐘  
梵開烟樵振衣上危岡目豁情已超羣山互回伏俯仰  
如相招蒼茫太湖波掩映長林標顧瞻橫天翼自哂枋  
榆蝸

訂友人春游縹緲

我思在何許縹緲湖中峰穿雲陟其巔浩蕩開心胸幽  
壑出地底澗松偃虬龍嘗聞獨往客每與靈仙逢徐生  
家莫釐隔水聞僧鐘兩峰近相望一葦能過從願言叩  
草堂遂躡幽人蹤相將訪靈異布韞隨孤筇山路梅花  
開烟嵐晚逾濃扁舟儻乘興花水春溶溶

清溪

白石何粼粼清流亦泥泥輕舟渡前溪兩岸饒萑葦落  
日秋風生停橈弔山鬼

一草亭為許南宮作

欲作草亭詩試問草亭狀草亭高幾尺草亭廣幾丈亭  
名誰所題亭詩誰所倡何人常往還何景可眺望待余  
到草亭言之始不妄

小魚

小魚長寸許杯水足自適置之几案間聊以供戲劇不  
自量微弱似嫌所處窄一躍落泥沙將為螻螳厄回思  
杯中咫尺千里隔我今憐爾愚復爾舊安宅傳語戒  
羣魚安分無求益

利背蠅

永叔賦蒼蠅具言可憎態猶幸無利背不爲人所畏不知蠅之中別有利背派蜂蠆雖有毒遠之斯無尋蚊蚋雖侵人扇撲亦一快今此利背蠅罪甚蚊與蠆其喙如鍼錐其性復狡獪忽去倏而來掩手不能逮平生未嘗聞乍見頗疑怪羗豎向余言是物出牛穢惰農與倦牧一見輒飽喙譬諸蛇虎然第爲山澤害君胡遠市塵曠野近此輩我心豈豎知聞之發深嘆

龍母祠歌

龍雖靈鱗甲之物非人形何爲人母產龍子或言子產母即死或云龍去母尚存敝衣匄食行荒邨鄉人惡之父母擯龍子思親來省覲龍入母懷母乃驚母翻因此喪厥生豈非人龍本殊類母亦不能通子意子愛母子母不知母旣逝子子乃悲龍一怒忽然平地爲深池役虱霆走蛟螭築高墳葬母尸或言母非死從龍赴淵水貝闕珠宮奉母居龍子龍孫盡歡喜神奇恍惚不可推佳見羊山塢裏巍然祠祠前一古柏滑澤無皴皮龍來目如炬蜿蜒柏上如藤垂前此數十年父老猶見之世間萬事無不有所以史策傳信兼傳疑但願神龍有神禱輒應五風十雨無愆期高原下隰多稼穡受龍之施報龍德子母千年長血食

石鼓歌

昌黎始作石鼓篇後來繼者相連延皆言字出史籀手  
歌頌宣后中興年或言成有岐陽蒐事見左氏非周宣  
揣摩時勢雖互異同在姬氏西京前尊崇謂是古逸典  
直與雅頌堪齊肩我生未及見此鼓竊睹摹本相流傳  
文辭脫落不可讀字畫譎詭猶能沿古人制書法有六  
形聲意象非徒然及觀此鼓殊不爾文繁義晦徒枝駢  
聖王制作乃如此武周遠遜秦斯賢若言此書籀所創  
考文自是天王權下逮春秋戰國世同文之治猶星懸  
况當盛時職太史敢變王制爭奇妍其他鐘鼎金石刻  
蛇神牛鬼紛糾纏是皆秦皇漢武代古籍焚滅成寒烟  
燕齊方士逞妖誕欺世惑衆談神仙或言培地得古鼎  
或造圖讖窮虛玄謬書偽器苟午出後人誤信何拘牽  
古文雖廢有明據物象滿目陳方圓參之聖經及史傳  
是非不啻如山淵誰能力闢謬妄說一掃昏霧開先天  
為深慈上人題画册  
上人示我画十幅烟水林巒紛在目誰拈彩筆為此圖  
乃是練川李自牧上人之兄黃懋昭頃者與余論素交  
自言今歲得一友李君意氣真吾曹信知李君故佳士  
豈直丹青稱画史日來旅寓向禪房不惜揮毫呈妙技  
師言册中第九圖短垣修竹對浮屠彷彿慧隆菴内景  
只多山色近城隅慧隆佳景吾曾識開門恨少青山色  
故教化筆役神工移得峻嶒置菴側



周烈女

何家郎身病亡周家女心暗傷墨朱履縞素裳夜竊起  
懸高梁周家女信節烈不知男女貴有別女道婦道相  
殊絕雖許字尚未婚目未識何郎面足未踏何郎門女  
兒之身父母身何為忍割慈親恩捐軀欲殉他家人舍  
生為取義殺身為成仁非仁復非義自經溝瀆真無因  
何郎母方卧疾朦朧曉夢中新婦奔喪來入室朝來聞  
訃知女死心既悲仍竊喜昔日病今良已夢中語不足  
憑若言女有靈雖死猶如生從來女子不出閫何得冒  
禮私自行郎家來載靈輦生未偶死相於舟前忽躍雙  
鯉魚雙棺權寄古寺居鄉人聚觀咸嗟吁上請當事旌  
門閭背經瀆禮不可訓徒詫奇節驚庸愚在家從父嫁  
從夫禮經明明不可踰願言正告閨中姝

石儔失去地理書一冊經歲覓歸作珠還篇次韻  
和之

方術種種皆誑語相地之說害尤巨人世禍福本自求  
豈有種麻翻得黍誘之天命已不然何況駕言地所與  
著書欺衆徒紛紜智者誠宜付一炬古人喪葬有定期  
宅兆雖卜有常處安有擇地并俟時停喪不葬歷寒暑  
悖禮非分覬福澤致令死生胥失所起爭滋訟傷骨肉  
平地無端成險阻願君悉屏非聖書修道致福咸自予  
天經地緯亘古垂慎勿苟求別機杼

雪裏紅

籬落徧積素愈知顏色丹故非嘉卉列聊作野花看天  
道存微物韶華惜歲闌芳心良獨苦誰謂不知寒

鐵馬

急響中宵發凌空鐵騎行不知風信至頓使旅魂驚當  
世正多事吾儕方苦兵那堪簷宇下又作戰場聲

黃孝子端木萬里尋親

父子分殊域趨庭道路難間關衝虎豹生死涉風湍乍  
識容顏在翻悲涕淚乾故園今共返猶作夢中看

張良椎

一擊或幸中扶蘇作天子劉項雖亡秦未必速如此

聞鴈

朔風吹鴈渡江干月白霜清響尚寒孤客幾回愁裏聽  
故鄉何處報平安

王錫闡 三首

錫闡字寅旭一字昭冥吳江人

詩話寅旭博綜羣書尤精歷象之學創新法候日月食較密于前人撰  
有歷法歷說大統歷啓蒙解園三辰儀畧諸書為人耿介拔俗詩亦不  
習

國有君

國有君不立太子立監國立子要當急奉迎立弟始知  
重社稷社稷危君不歸社稷安君自還都門揖讓臣民  
歡誰為謀主生讒言南城樹可伐東宮位可易復儲未

許已復辟哀哀其豆煎何急

遣興

大木蔭數畝青蟲生其陰垂絲自相絡枝葉交受侵樹影日夕疎蟲窟亦不深貪生戕厥本徒然飽飛禽

幽居

北牖微風度斜陽意獨醒寒溪沉鷺白夏木挂蟲青理釣竿成曲爲農具有經鄰翁尋舊約倚權渡前汀

沈祖孝

七首

祖孝初名果字因生一字雪樵又字雪漁烏程人有湖干硯傭當泣陶年吟安下簾等集

詩話雪樵至性之士詩皆從肺腑流出

擬孟武昌答元道州

并序

道州刺史元結作退谷銘指曰干進之客不能游之作杯湖銘又曰爲人厭者勿泛杯湖後獨作詩招孟武昌則士源可知矣疑其必有荅而未之見也因擬作詩以補之

君言退谷好令我移神情又言杯湖上坐見夜氣清白雲自來去明月照薇蘅湖魚躍波出山鳥相飛鳴江水漱絕壁斷壑迴春聲嗟彼武昌客一命羈塵纓退谷石峩峩杯湖水盈盈來游苦不早爲君矢平生

歸里

宿昔有故人意氣聊自厚五年生死塗沉骨或已朽存

者會面稀相見倏老醜上追喪亂端下道別離久陳說  
艱難中往往開笑口哀哉隔世人今夕復杯酒

感述

河海東北流日月西南行治亂會有數智者誰能爭干  
戈循道路豪傑從中生致身青雲端豈少韓與彭所貴  
能識時不在標英名南陽非三過沉志猶躬耕

于忠肅墓

不讀先生傳誰知社稷危中原無恙日少保大名垂獨  
定千秋業偏留萬古悲自來墮淚碣寧上峴山碑

翫月

月色仍無際長空失半輪關山初一鴈寇盜尚三秦已

近聞砧夜方悲落葉新秋風蘇病骨擬作渡江人

蟋蟀

夜蟲啼不已向曉益啾啾八月寒如此終宵恨未休有  
聲寧待和無力自知愁總值秋風裏何能遣百憂

無題

相見何由恨亦空畫樓簾卷怕花風枝頭葉葉今朝綠  
苔上星星昨夜紅西鳥有生多共命春蠶無歲不同功  
偶然閱罷昆侖傳便欲焚香拜此公

戴笠

二首

笠初名鼎立字則之改今名更字耘野又字曼  
公吳江人縣學生

詩話曼公谷隱巖耕不入城府句如愁邊細雨孤舟遠夢裏青山故國  
春夜雨聲中流水急東風陌上野花開眠處夢裏誰家地啼鴉聲中故  
國秋大有孤  
山處士遺韻

秋望

晴空浩無垠一碧淨千里有似至人懷澄泓湛秋水寒  
鴉起半山孤飛不能已蕭然萬感集四顧蒼茫裏

有感

老大徒傷事事非三年客裏故山違涼風動地迷衰草  
白露侵人透葛衣江漢數行鴻鴈斷天涯幾箇友朋歸  
凭闌盡日思佳句西北遙瞻是落暉

彭士望

三首

士望字躬安寧都人有恥躬堂詩集

小姑山

昔日元道州曾運醉魚舫豈若茲石奇兀傲羣流上日  
月與俱浴雷雨亦相盪樹無凡鳥栖檝共山僧養山產  
檝木  
苦節風波中獨立本無黨

湖上獨眺

湖水尚如昨樓臺望已稀可憐相識燕猶向舊家飛

雨中寄山中人

漠漠湖天雨坐閒濃烟疎樹有無間懷人似共瀟湘遠  
一點輕帆九面山

湯燕生

二首

燕生字玄翼一字巖夫寧國太平人有商歌集

赭山 二首

赤鑄山頭鳥不飛  
朱衣曾此易青衣  
連營戰士爭投甲  
古寺殘僧但掩扉  
姑孰湖陰俞騎失  
景陽樓下遠鐘微  
傷心莫唱淋鈴曲  
未得生從蜀道歸  
淚逐天風向北揮  
山僧指點舊重圍  
軹車東駐泉偏咽  
代馬南來草不肥  
野老久知今日事  
侍臣猶護昔年非  
延秋門外王孫盡  
司馬元戎自錦衣

張宗觀 四首

宗觀字用賓一字朗屋紹興山陰人

詩話朗屋以王霸之略自許與朱朗詰齊名時號山陰二朗朗詰坐事繫獄朗屋號呼於所知斂重貲賄獄吏得不死既而論釋朗屋聞之大喜踊躍夜渡江為盜所殺其詩  
恢奇磊落樂府古風尤絕倫品

獨漉篇

獨漉獨漉高岸深谷  
豈不欲渡慚無車軸  
解一鴻生北野  
翩翩南翔悲風四合  
亂我行藏  
解二普天同雲雨雪灑灑  
念我故人躊躇中野  
解三天生快馬必有健兒士  
無知己  
泣下語誰  
解四猛虎在山亦有人行  
一夫執志七國縱橫

代阮籍詠懷 三首

朝雲發空山薄暮不顧歸  
曖曖結重陰白日沉光輝  
日斜涼飈起飄飄西北馳  
念子永滅沒有何相還期  
寄語世上人浮游安所依  
灼灼樊中茗苦畏白日光  
太陽榮萬物念子何獨傷  
池魚依水游飛鳥因風翔  
浮沉各異勢性情亦有方  
至人

齊萬圃大小以何量

麋鹿空山游壽命懸庖厨人生盛繇華結根在丘墟容  
顏不常好懷抱亦區區悲風飄白日百年何須更不見  
柱下史骨肉沉山隅尊酒聊自寬為子立斯須

朱士稚 六首

士稚字伯虎更字朗詣紹興山陰人門人私謚

貞毅先生有集

詩話山陰二朗具郭景純雋上之才仗劉越石清剛之氣令假以年直  
可凌顏樂陳卧子詩云越國山川出霸才二子咸以管樂自命誦朗  
誥讀史詩云英雄窮賤盡無策天下侯  
王自有時慨當以慷不帝擊缺壺口也

折楊柳行

鸛鶴出雲霄黃鵠參天飛憤憤世俗間遠道隨所之  
解一

百川日以東日月日以西在生獲笑語何必故鄉依  
解二  
遊盼不恒處所遇皆新知邂逅成歡悅及彼未生疑  
解三  
行行過崇朝豈能若初期一去自參商克終有阿誰  
解四  
愁來北上堂撫絃調哀絲清商變流徵莫怨他人非  
解五

怨詩行 二首

國亂治以猛民乃懷其刑稂莠既不除佳禾無由生報  
虐罔或干孥戮垂章程漢術雜王伯故能致清寧徒為  
仁者言法亂國是傾明刑以弼教後世稱聖明  
事間不容髮脫兔非可追機宜不在大所貴無失時若  
以一朝宴便遺終身危是以天下士斷絕乎多私功成  
以明決敗謀在蓄疑

臘月

今年臘月歸未得獨在烏程縣可憐隔岸橫飛西塞鴈  
前門數纜下江船高城哀柝兵戈側短布單衣雨雪邊  
笑語逢迎隨契託故園何處淚潛然

寓揚州

淹留車騎引杯看獨上高樓愁未闌千里鄉關聞過鴈  
萬家風雪醉憑欄天涯客子依人苦江上梅花倒地殘  
莫道春來動南北故人尺素遠長安

與嵩菴宿普照寺梅花書屋懷寓邗諸子

普照堂前三樹梅天涯詞客過徘徊卷簾當戶分晴雪  
倚檻層霄放酒杯漢苑春風江上隔揚州驛使笛中回

自憐遲暮逢花滿欲折瑤華幾度哀

吳

騏 十一首

騏字日千松江華亭人有顧頴集

吳六益云日千詩法隨意轉

詩話日千力崇正始其詩沉厚不佻

幽州馬客行

渴馬不擇水飢鳥不擇食健兒貧欲死那得不作賊

塞下曲 二首

固原城郭控西秦遠戍今經二十春家在洛陽城下住  
經年不見洛陽人

四牡駢駢出玉門詔持繒帛賜烏孫為言侍子今無恙  
初在京師讀魯論



少年行 二首

下馬同傾酒一尊侍兒匕首割蒸豚生平不著黃金甲  
醉袒貂裘數箭痕  
紅玉鞍橋碧玉驄樂遊原上柳絲風詔求季布今何處  
只在三千奴僕中

讀史雜詠

販繒洛陽市恒受市賈欺關津征稅重折閱苦不支市  
籍非所樂况復寒與飢相驅入大澤揭竿爲旌旗從龍  
入灞上神器忽以移南面據茅土成績銘鼎彝人生非  
困窮孰能履危機安危在反掌詘申難前期寄言倚頓  
流終無封侯時

送別陳皇士王雙白

西風吹孤鴈嗷嗷多哀音張燈對離觴愁思故難任與  
君雖異縣纏絲結中心願采芙蓉花爲君製衣襟願琢  
荆山玉爲君備華簪願折若木枝爲君斲鳴琴微誠苦  
未致驪駒何駸駸疎星燦河漢殘月下北林攜手立斯  
須厚意比兼金相思各自喻滄海未云深哲人重名節  
歲寒心所欽高義良不渝在遠匪難諶

寄計子山

望爾歸吳下仍聞到洛陽多才應自惜信美豈吾鄉北  
望雲千疊南來鴈數行客衣殊可念昨夜有微霜

苦雨

石罅泉俱發湖田岸不通侵堤初作浪仆樹更兼風溟  
滓千邨黑微茫一火紅烟波歸櫂晚獨立羨漁翁

和張昊東秋圃閒吟

暮雲收盡楚天青銀漢高寒玉露零誰伴孤臣雙淚落  
夜深殘葉下空庭

鬼語

茂陵枯柏自嶮岼露重珠襦馬上寒獨與銅人相對哭  
淒涼殘月下金盤

朱鶴齡 二首

鶴齡字長孺吳江縣學生有愚菴小集

詩話長孺說經鑿鉅長於箋疏之學所撰毛詩通義尚書傳禹貢箋  
注左傳日鈔發明宋儒集注集傳所未及顧不甚傳惟杜甫李商隱集

注盛行於時松陵文獻稱其道落世事晨夕一編行不識  
路途坐不知寒暑人或謂之愚因以愚菴自號蓋實錄也

賈志詩

溪流湯湯下田得魴網罟既設淵魚知藏棗實離離蒺  
藜間之阪田自美奈何不治蘭艾同榮望秋則橐雖在  
東薪終是芳草日出日入皇皇宮庭含精吐景爰保吾  
生

感遇

薇蕨苟可采何必在首陽清流苟可汎何必在滄浪至  
人處委蛇守己非一方直木寧見伐芳蘭寧遂傷縱志  
游霄漢俯仰隨翱翔

歸莊 三首

莊字元恭崑山人有恒軒集山游詩

詩話恒軒好奇世目為狂生善行草書嘗題其齋居柱云入其室空空如也問其人踞蹠然曰鄉鄙傳之謂可入啓顏錄其名字屢更崇禎中忽請于學使者改名柞明自是以後或稱歸妹或稱歸乎來表字或稱元功或稱園公或稱懸弓恒軒其別號亦號普明頭陀又號慶鑿鉅山人沒後女婿金侃輯其遺詩及文名字一從其舊焉侃處士俊明子能詩画亦隱居不出

游石公山

昔年游石公困頓不賦詩今來登臨罷援筆狀其奇龍  
渚絕流來遙指山之厓舍舟明月灣一杖尋湖渚仄徑  
數上下雲木相蔽虧橙橘雖未熟垂實方離離初歷歸  
雲洞石勢高且欹懸知陰雨夕發隸繞四陲行過招提  
境岡巒峙參差雲梯落照臺所在恣娛嬉微嫌標題多  
反非洞壑宜絕壁數十仞仰首歎嶮巖中為一綫天股

栗步難移攀援僅得上俯瞰彌浮危五湖三萬頃波濤  
堆琉璃青峰七十二羅列如奕棋豁然盪胸懷置身如  
雲達山頭名角里水上呼鷗夷東行駕青蚪西邁驂白  
螭翱翔帝座旁棄世忽若遺悲哉塵中人仙蹤不可追  
下山憩石坂湖水激其涯可以濯冠纓可以垂釣絲老  
僧指其旁石屋如雲垂深在太湖底大旱始見之探幽  
得石梁水深不可窺有洞名盤龍蜿蜒復灑迤石上鱗  
甲痕定非人工為雙屐窮高深佳處輒栖遲頗幸筋力  
強殊勝前游時僧房不禁酒入門索深卮一酌解飢渴  
再酌忘勞疲今日樂相樂為問同游誰山中兩比丘同  
邑葛雲芝

入鄧尉山

我行入西山山谿涸無水舍船就籃輿旋轉三十里四望梅花林不辨香所起來道無斷續依山有層累不于斷橋邊登頓深林裏飢飭固不辭日暮焉棲止疎鐘雲際出循聲進屐齒玄墓吾舊游古刹無乃是老僧引前路灑埽延客子入門問枕簟傾壺酌甘醴斯游無前期當窮洞壑美湖山百里間登臨自此始

登嚴州城

嚴州州城高且堅東北直亘山之巔千嶂迴環失朝旭萬家稠疊霏寒烟浮圖雙立自俯仰江水一帶遙盤旋我行從此恣登矚心畏猛虎不敢前

陳三島

九首

三島字鶴客長洲人有雪圃遺橐

詩話鶴客志士所居蓬戶席門而求友若不及中懷孤憤恒露于眉宇之間其詩初神游于大樽後心折于朗詣華整之中間以清商變徵之調惜乎早逝未盡其才

贈魏允枏

子春刺船去伯牙鼓素琴羣鳥相鳴號海水為陰沉寥寥千載下四望無知音朝歌猗蘭操暮歌梁甫吟抱膝一室內俯仰增悲心孟秋涼風至颯然吹衣襟

出門

出門何所之茫茫使人悲俯視江澥流仰觀星漢垂舉世趣荒淫我獨無因依采苦充飢腸其味甘如飴存亡

且不恤毀折何所辭窮塗共抵掌俠骨輕流離揚旌建  
枹鼓舍矢貫熊羆躍馬出戰場決死夫何疑繾綣戀妻  
子壯夫所弗爲

同顧茂倫對酒有作

盈握寶燕石遺棄荆山璆束芻飼駑馬駮駟困道周窮  
達各有命智勇難自謀飄飄閱年歲坎壈生百憂黃金  
一散盡骨肉誰見收雖有命世才蹇步悵夷猶烈烈鳴  
悲風蕭蕭吹敝裘飲酒不自快拔劍逝難留仰天長歎  
息揮淚別故儔

雜詩

引領望閭闔白日何蒼蒼同心乃離居隔越成參商憶  
昔夢乘雲凌風過沔陽頃刻千萬里飄然在瀟湘陳辭  
就重華摳衣上玉堂處妃吹參差玉女奏霓裳婉變相  
攜手沉歡不可忘

川扇

險絕蠶叢地繇來宮扇傳大都白帝竹盡用錦官箋出  
匣風初轉垂綸月半圓人間遺玉柄猶是漢宮年

盤龍

開簾方過錦刻燭進盤龍玉樹低宮月春風度苑鐘霓  
裳昨夜舞垂手昔時容寂寞昭陽殿還應白露濃

白門寒食

每逢節序益堪悲栗杖過頭強自持水閣孤舟諸弟隔

春深斗酒故人遲行廚糗粒停新火廢苑棠梨發舊枝  
欲上風香高閣望石城密雨正垂絲

山中逢王雙白

攜筇獨步避青苔帳望南峰烟霧開半岸夕陽長笛起  
滿山落葉故人來天空孤鷺飛橫渡日暮飢鷹下戍臺  
握手相逢難即別關河此日重徘徊

登湖州城樓

白蘋洲上晚峰晴峴北苕南百里平湖口寺從雙樹出  
城陰潮自五亭生春歸井邑桑榆暗雲散溪山島嶼明  
擬向烏巾沽宿釀故人迢遞若為情

徐晟 三首

晟字禎起一字損之長洲縣學生有陶庵詩刪

魏冰叔云禎起吳門隱君子其詩頓挫沉鬱幾與古人  
方駕即使辭有未工必不稍有矯飾以自害其性情

詩話禎起交情真摯悃悃無華詩皆自  
道性情雖以陶菴自稱不盡規撫栗里

上山采薜蘿

戚戚遠行邁悠悠芳草深芳草亦何思感此懷春心懷  
春苦離別邈若雲漢沉聽彼晨風鳥隔林振好音雌雄  
相鳴和顧盼同高岑驚颺無失侶歸雲有定林如何形  
影弔不獲偕飛禽采采上山去賤妾長苦吟

秋夜讀書

開秋滌煩疴暫息桐花陰抗言懷往昔大雅力不任秉  
文溯漢魏禁使流俗侵古之風騷徒皆知天地心落魄

草澤間哀怨遂以深感物懷殷憂濁酒聊自斟來者日以促升者日以沉蟋蟀鳴我堂中夜起悲音微風吹羅袂明月輝前林先民不可作厲志登高岑

題昭明讀書臺

地有昭明蹟山因虞仲開千年圖畫裏登眺幾人來故國江花發春城海燕回年年孤嶺月偏照讀書臺

明詩綜卷七十九

明詩綜卷八十上

小長蘆 朱彝尊 錄

武林 裘瀾生 緝評

談 遷 一首

遷字仲木一字觀若海寧人

靜志居詩話仲木留心國史考證累朝實錄寶訓博稽諸家撰述於萬曆後尤詳號為國權中年燬于火乃復沉思強記覆閱羣書詢之故老墨枯筆秃飢不及餐晚克成編南都議上景皇帝廟號曰代宗一時以為當仲木獨以為非有答友人五言辭雖未工有關於典故特錄之

答友人問景皇帝廟號

成周作謚法大小行乃傳公旦暨師望肇制自聖賢相古后皇陟南郊必稱天易名典克慎敘法宜精專漢後避帝諱臨文率拘攣唐以代易世宋以真易玄其文雖

或殊其義則一焉景皇承大業即阼凡七年多難固邦  
國文武要略全屢遣奉迎使事兄禮因愆及乎裕陵返  
黃離位南偏初非囚堯城奪門言何諠梁瑤策始建張  
懋冊用宣廟號猶未備何以垂簡編禮臣失不學代乃  
居世先相越僅五世文義詎可沿謚說十五家秉禮恐  
不然盈庭以為是橫議臣談遷

柴紹炳 一首

紹炳字虎臣錢塘人

吳山春望和張子

及爾吳峰攬曙暉江南風景自依依雪消春色江湖闊  
樹隱晴烟島嶼微故苑草生麋鹿上高臺花滿鷓鴣飛

誰知目送年華好腸斷登臨淚濕衣

徐繼恩 一首

繼恩字世臣仁和人崇禎壬午貢生晚為僧名  
靜挺字佺亭有十笏齋詩鈔

錢塘懷古

胥丘西郭水連天慶忌孤墳落照偏夜夜海潮飛白馬  
年年江月度烏鳶越王臺榭愁荒草吳苑笙歌泣斷烟  
七十二峰零亂後只今依舊采蓮船

沈謙 六首

謙字去矜仁和人東江集

陸麗京云去矜少喜溫李  
見華亭陳給事作乃循漢

魏之規架踏初盛之風致其意貞而不濫其聲和而不流  
毛馳黃云去矜上湖漢渚下泛唐波操律比韻特見精妙



詩話西陵十子多以格調自高  
去矜兼采組于六朝故特溫麗

情詩

高臺薄蒼天日夕悲風興軒牕啓四戶曠望凌百層圓  
景皎夜光文昌低玉繩拊劔發長嘯涕淚沾我膺游觀  
以解憂彌令心蘊蒸慷慨進美酒安復計斗升故鄉在  
東南馳情念良朋我亮無六翮焉得遽飛騰

擬古

崔嵬上北邙墳冢何纍纍珠襦與馬革共盡知阿誰朝  
見烏鳶飛夕聞狐狸悲信誓匪不堅誰為同棺灰長歎  
內傷心富貴亦何為

山居

昨辭郡邑游歸就田園居早穫既已畢比舍停役車天  
澤幸不偏大小各有儲蒼茫十月交霜寒林木疎墟烟  
暮曖曖落日照我閤牀頭酒應熟喚婦羅前除彈我匣  
中琴讀我枕上書亦知為農樂富貴復何如

石彭亭晚步

野徑愁行客危亭噪落鴉川虹秋抱日山鬼夜迷花塔  
古郎當語碑殘鬣肩斜桐魚焉可問博物媿張華

夜寄張祖望

憶汝空齋裏悲歌靜夜闌酒醒啼絡緯燈暗出豬籬落  
木山牕曙明星布被寒漫憐作客久詞賦且江干

宿長春山

琳宮寂寂啓牕紗誰把瑤笙弄月華春冷鶴棲珠樹雪  
夜深風掃石壇花天門北望來真氣海色中宵見曉霞  
欲覓長生知有地豈須勾漏采丹砂

胡介九首

介初名士登字彥遠錢唐儒學生有旅堂詩集

陸冰修云彥遠古詩澹宕頓挫自有神韻近體在隨州黃州間

詩話新安程觀生仲孚奇士也好談王霸之略兼治青烏家言其持論謂人家葬吉壤出聖賢者第一其次忠臣節士又其次博學就徵以科甲爲最下嘗坐事繫獄當論辟先君子力救獲免恒下榻寒家學易於蒙難之後平生最契合者先君子之外與彥遠稱頌交所載漢唐以來易義動累百家同異紛綸條分縷解兩人皆好游亦皆無子彥遠自河渚徙宅一畝田暇與室人翁少君門內唱酬晚逃于禪年未五十而卒其詩不屑效西陵派謂吾盡吾意免俗而可矣仲孚有弟忘其名字五經進士譚公元孩之客死漳州也先君子請程君入闈扶其柩程君許諾先君子坐之堂上行四拜禮程君受而不答甫度梨嶺而程君病卒目不瞑予中表兄舟石哭之逆旅枕中得先君子書回視君目瞑矣此

又一奇士也

### 答萬年少

蘭葉被芳洲春花吹白日平生此離居懷子念非一江  
淮成阻修合併喻琴瑟會合曾幾時春風送行客

十五夜至江上作

夜是中秋夜船隨估客船塔凌青漢迴月湧大江圓節  
序消行旅關山入暮年故園猶在望獨立轉茫然

蕪城訪龔半千

陋巷龔夫子重來郭北尋到門還傷柳種竹未成林易  
失青山約難消白日心不須傷老大絃絕有知音

北還夜泊吳門

身從江北歸愛看江南樹烟樹夜冥冥知入吳閶路

清源道中

寂寂關山對落暉平沙千里旅人稀健兒一騎投南去  
衝起飢烏掠地飛

雨中懷陳四康侯東歸

楓落吳江客路寒布袍江上思漫漫孤舟一夜風兼雨  
人到嚴陵第幾灘

西谿竹枝詞 三首

山行處處曉光開十八溪邊載舊醅有屋盡從梅裏出  
無泉不自竹邊來

溪上女兒鬢蓬蓬鬢邊滿插映山紅逢人間路公然應

指點前溪東復東

郎住前溪妾後溪采茶生小慣相攜月明各自提筐去  
一縷茶烟隔竹西

沈蘭先 一首

蘭先字甸華仁和人

雜詠

末世好祥瑞朱草生殿傍五蹄爲白麟一角名神羊長  
尾稱騶虞華彩類鳳皇大僚揚雅頌小臣獻文章皇帝  
千萬歲盛德追陶唐

查崧繼 一首

崧繼字柱青後更名遺字逸遠號學圃海寧人

補海鹽縣學生有澄清堂集

揚州詞

江都士女蕩輕舟傳說當時翠輦留二十四橋人散後  
風吹螢火徧邗溝

陸啓宏 三首

啓宏字叔度平湖人貢生有貢趾山房集

詩話叔度論詩以杜陵為圭臬然大陸才多少枚賦敏酒酣擊盞與會  
所至累牘連篇亦不復拘格律也性最豪邁游金陵大會詞人于桃葉  
渡妓有呼延紅菊者武安人倚船牕謂女伴曰今日之集惜無兩岸芙  
蕖君乃復治具張燕至則晚風拂席荷香襲人四座莫測其故蓋笑一  
日以善價購得百缸碎而沉之自是十四樓中奉為上客既而走京師  
詩名藉甚遇寇亂歸里既窮而死其友趙退之誄曰總君一身頓殊今  
昔翩翩五陵蕭蕭四壁金散名成人完代革聞者以為括其要云

送姜子宣南歸

與君結情好盼睐非一時疲馬惜同路倦鳥惜同枝自  
顧各飢寒誰能相護持夜來樽酒共朝起東西馳飄風  
吹浮雲聚散安可知客久思故鄉力往不復疑結鄰昔  
有約慎勿乖前期寒當共我寒飢當共我飢

高粱橋

冬郊未經雪殘葉猶戀樹山水入高粱淙淙橋下渡萬  
物靜相忘豁然領奇悟及此見夙心斜陽忽西暮

送王鱗長之襄陽

襄水東流入漢長大堤兒女踏春陽客心滿醉宜城酒  
不用登樓望故鄉

錢士馨 二首

士馨一名馱字稚拙又字稚農平湖人貢生有

賡笳集

詩話稚農韶年儻易不羈游白門與青樓妓曠欲挾之歸妓曰以君之才妾侍箕帚宜也但觀君談論恨讀書尚少願以異日稚農恥之還里門假東湖僧舍以居夜讀昭明文選一沙彌前曰秀才年不為少矣乃尚讀此兔園冊邪稚農益以為恥發憤研究經史多所撰述從來說周禮者謂冬官不亡散見五官之中故自臨川俞廷椿後多以意取五官之屬以補冬官稚農獨据尚書大小戴記春秋內外傳以補之君子以為篤論晚入燕過寇變著甲申傳信錄十卷頗不失實平生賦詩無多能遠時習

黃鵠

鴻鴈憂同羣終夜多彷徨鷺鳥愛其儔宿昔同相將何况雙鳳翻臨風欲分翔所賴詩言志可以陳離觴被之空桑琴淒其發清商歌管相與和聲絲益悽愴中心已如結何能使復揚聽此意不平改絃欲更張呻吟未成

曲淚下沾衣裳

甲申三月紀事

建章宮殿鬱蒼茫極目空餘複道長血濺珠襦迷斷篋露零銀樹覆宮牆出犇惟有趙宣子結客曾無秦舞陽悵望衣冠在何許橋山西是白雲鄉

彭孫貽 五首

孫貽字仲謀一字羿仁海鹽拔貢生鄉人私謚

孝介先生有茗齋集

王貽上云仲謀詩宏深奧衍窮變極奇

建昌城

白水橫官道青山繞廢城餘民百戰盡落日一江明露下秋菰斷營空野鶴鳴僕夫已憔悴前路自相驚

自豫章上虔南

南上千盤路東風半月程浮雲鄔子驛殘日灌嬰城江  
色連吳楚溪陰變晦明兵戈漫回首總是故園情

發南浦

渺渺西風引素波片帆南浦入烟蘿空城木葉驚秋早  
故國浮雲帶鴈過白髮暗生江月滿青山無主夕陽多  
天涯游子增哀怨腸斷吳西囉嘖歌

雞鳴

怪殺長鳴雞自謂知天曙歸夢不分明又渡秋江去

聞鷓鴣

章水東流貢水西鬱孤臺下草萋萋雲山萬里行應遍

山鳥空勞向客啼

吳蕃昌 一首

蕃昌字仲木海鹽學生

詩話仲木貞肅次子師事劉念臺先生與海寧陳確潛夫桐鄉張履祥  
考父講洛關之學詩非專格卒時母喪未除遺命以衰經殮其從弟哀  
仲居母憂過哀卒於喪  
次里人並稱為孝子

初夏浴鶴亭即事

桐花初吐燕歸巢卷幔荷亭草樹交浴罷清池一雙鶴  
雨餘斜照滿林梢

吳謙牧 二首

謙牧字哀仲海鹽學生有困勉齋稿

谷水歌

日言經卷八十一  
雲峰九十九蒼翠滿山松借問清秋月先懸第幾峰  
我登湖上樓湖上秋風發蕩搖湖水光欲墮雲中月

吳統持 二首

統持字巨手嘉興府學生有危齋集

題画

古寺寂無僧山深寒更雨泉流暗竹中似覺有人語

題山居圖

移家避地入山深恨未藏名尚可尋喜得秋來黃葉下  
不知有路到雲林

金嗣孫 四首

嗣孫字龍友秀水儒學生有鐵巖集

詩話龍友下筆不能自休間有合作

正德宮詞

月射牕紗映画梁芙蓉闕北鬱金香西宮今夜停歌舞  
聞道官家宿豹房

天啓宮詞

玲瓏玉束繫鮫綃素腕雙擎碧玉簫萬壽山頭歌急拍  
一聲聲唱雒陽橋

崇禎宮詞

雉扇乘雲啓鳳樓持宣命婦拜長秋賜來穀雨新茶白  
景泰盤承宣德甌

九日風雨舟過長溪

白蘋風起冷荒丘  
小雨輕寒水國秋  
四海文游半飄泊  
幾人憶我上重樓

李標一首

標字子建嘉善人有東山遺橐

詩話子建精於戎機戰略軍律營陣壬遁諸書史閣部道鄰辟為記室見事不可為返里與魏吉士子一深契當吉士公車北上執手河干謂子建曰子夢斜塘見茫茫一片土無復雞犬桑麻行後得無有變乎子建戲曰君且富貴宜口中無人爾甲申吉士喪車還經斜塘子建撫棺曰子一子一果妖夢是踐邪因慟哭失聲旁人無不流涕繼聞史公殉節揚州渡江會葬其衣冠于梅花嶺歸而遶屋皆種梅賦詩三十首蓋自託於西臺慟哭之謝參軍云

寄懷無塵上人

蒲柳先衰感鬢絲  
孤蹤不定益淒其  
十年結客家貧日  
萬里懷人淚盡時  
渤海波深龍卧穩  
江山秋老鴈歸遲

長天一望情無極  
空寫新詩寄別離

沈起二首

起字仲方嘉興縣學生晚為僧名銘起字墨菴

有學園錄續集

詩話仲方質敏讀經不沿傳注每自出意解聞者解頤年近三十始列青衿有御史某按嘉禾倨坐自尊屬吏皆股栗謁孔子廟畢進諸生講四子書仲方請說攻乎異端義拱而前曰太祖高皇帝曾說此章書御史乃出位旁立鞠躬輟講方坐觀者肅然中年入東禪寺為浮屠非其好也嘗擬撰明書謂明不亡于流寇而亡于嚴衛斷自成化十二年秋始設西廠絕筆焉晚節以窮死

謁泰伯祠

古廟當閭闔遺碑讀未休  
景陵乙卯歲知府况鍾修輪奐  
今何在榛蕪更幾秋  
人情日涼薄至德竟荒丘

宿彭澤



帆影收南岸江聲斷不流秋高彭蠡澤鴈下荻蘆洲一  
水天無際千山月上頭墟烟人語雜鄉思倍悠悠

吳系一首

系字方輪後更名宗潛吳江人補秀水學生有

東籬野人詩草

詩話方輪兄弟九人兵後存者率棄諸生不就試鄰壤隱君子相與往還酬和篇章甚富於是方輪輯其詩為驚隱篇方輪弟九畹輯其詩為歲寒集是亦月泉吟社玉山雅集之流也

夢亡姪女有感

一女天何忌先兄脈竟殲可憐形旅夢猶自索香奩負  
託心嘗媿來依鬼不嫌五年如昨日別淚醒時添

吳振蘭 三首

振蘭字九畹後更名宗漢吳江人補湖州府學

生有南村集

於忽操 二首

於忽乎不可以為其又奚為竝坐而嬉吾安知其為魑  
雙笑而視吾安知其為魅謂神姦可避兮神禹鑄以貢  
金孰虞世事之茫昧兮經泗水而銷沉驪兮魅兮爾何  
忌兮

於忽乎不可以為其又奚為輶輶之軸積羽折之孟津  
之隄羣蟻穴之物莫不輕于所忽致今日之若斯嗟前  
人莫之圖兮後來者若之何其

和孟東野審交詩

枳棘初生時青青似柑柚滋養待成林芒刺傷我手結  
交非其人不但初心負名義如日星斯人等埃垢君子  
田中禾小人田中莠同畝而異根安得秋實茂寧爲管  
華薄莫效蘇李厚厥初或依違鮮終誰執咎

吳重暉 二首

重暉字曉山後更名宗泌有西山集

經新市廢刹

破寺僧亡盡巢鳥徧老松獨憐今夜泊月落不聞鐘

將移居題壁

淵明歸去來門栽五柳碧待得柳成陰主人翻作客

吳如晦 一首

如晦吳江人有今樂府

五人墓

尚公坐羣兒趨清流士當受誅周吏部灑別淚尚公聞  
檻車逮吏部行吳民驚毛開府喑無聲較尉言尚公詔  
嗟鼠輩勿聚嘯謂汝詔出天子尚公誰惡敢爾五人呼  
萬人起緹帥血滴泥裏此五人良非愚慷慨死真丈夫  
虎丘南廳以馳巍然者尚公祠祠未成冰山傾山南土  
俄已平廢基下新碑樹巍然者五人墓

范風仁 一首

風仁字梅隱嘉興人

秋日卹居

一川秋色淨蒹葭南浦風多日易斜越客夢隨江上雨  
山城月照柳梢鴉賞洲有曲翻漁譜蟹舍無人落藕花  
新水滿湖閒縱櫂市喧應不到農家

金甌一首

甌字完城一字寧武秀水人

春晚

竹杖筠車處處山游人日日看花還縱然紅紫風吹盡  
依舊鳴禽綠樹間

朱復一首

復一名臨字淪六又字載陽嘉興人

七夕

城頭涼月到溪亭銀漢無光掩鵲翎可怪女牛終古渡  
不愁化作老人星

黃宗炎一首

宗炎字晦木餘姚人有二晦山棲集

詩話晦木厭時流詩派之熟專學宋人講易獨開奧力  
辨太極圖之非禮法之儒摯議不顧蓋崛強其天性也

屯溪至漁亭

竹筏清溪逆水牽魚游常在鏡中天夜深孤鴈驚船尾  
日落雙猿抱樹巔九里十灘尤懊惱一程五舍尚遷延  
胡麻赤米邨邨種翻羨山家墾石田

董鑿一首

鑿字子長會稽縣學生

唐宮詞

羯鼓聲高舞袖長製成小管自寧王太真獨愛涼州曲  
自出金錢賜耍孃

詩話此詩曾刊入今詩粹及見子長臺本  
改定覺詞意倍工詩所以貴推敲審酌也

朱用調 五首

用調字子彞紹興山陰人有固亭遺橐

詩話子彞五律原本襄陽太白故以跌宕見長誦之如食哀家梨  
但覺甘脆七言如古祠老樹寒鴉集官路斜陽牧馬還亦名句也

江南曲

蓮葉南塘暗蘼蕪官路齊相逢弄珠客舊識浣紗溪  
子夜歌初變牆頭烏欲啼莫愁何處住言訪石城西

西陵望江樓送客

驛樓數去程臨別酒復傾幾日樓前柳春風吹滿城雲  
帆忽遠去水鳥齊哀鳴浩蕩西陵路離懷若與并

送陳無名歸暨陽

歸去楓溪好千山如畫圖花邊開板屋竹裏見晴湖送  
爾惜芳草到時聞鷓鴣應憐浣紗石酒罷月明孤

鑑湖寄錫鬯

烟暖紅蘭新鴛鴦飛近人一壺如碧玉愛此鏡湖濱  
年年二三月日日桃花春不減武陵渡欲邀劉逸民

秋夜奕喜宅送姚文初

曲池高館鏡湖偏錦樹黃花照別筵客醉暫同今夜月  
鴻飛遙指暮秋天孤邨風起蒹葭岸故里寒生橘柚烟

歸去正逢搖落後倦游寂寞有誰憐

張杉 二首

杉字南士蕭山人有集

詩話南士周見洽聞賦才獨步詩篇和雅無傲志之音

苦寒行

玄冬涼節屆朱方寒氣侵天地自騷屑原野何蕭森長  
晷麗北陸遠飈激中林白日澹無色同雲凝層陰履霜  
知冰堅集霰悲雪深空山號飢獸古木喧寒禽但聞落  
籜響豈復流泉音朔風襲阿閣重裘苦難任顧此貧居  
士短褐無完襟慷慨誰為語苦寒徒自吟

雜詩

翩翩雙白鶴飛鳴相徘徊朝發青田鄉暮入紫蓋陞良  
辰忽已去雨雪正霏霏中路多艱阻不免寒與飢稻梁  
非不甘常慮虞人機矰繳方交互禍患昧前期躑躅樊  
籠間每令鷄雀嗤願言厲六翮努力慎高飛

戴鏡曾 一首

鏡曾字餘照蕭山人

香山

香山小而高側立太湖上鳥從澗底飛泉落樹頭響

魏方焯 一首

方焯字大方紹興人有問霞閣集

廣陵有懷故鄉諸子

明詩紀卷八十  
十五  
作客還依客思歸只夢歸愁連春草長意逐野雲飛白  
是三江隔毋嫌尺素稀登高儻相憶應亦望斜暉

史 玄一首

玄字弱翁吳江人

東湖雜詩

西望藏軍洞君王舊事非城空賓客散戍老甲兵稀香  
徑埋幽草梧宮暗落暉山頭迷眺處白鶴自忘歸

徐 白一首

白字介白嘉興人徙居吳江有竹嘯菴詩鈔

朱長孺云介白自鍾譚入門能不熏染其流弊 潘  
次耕云處士詩幽冷刻深不肯蹈襲前人一字  
詩話介白初師景陵詩派務以幽深孤峭為宗後以  
太湖落日賦見賞于陳卧子晚年持論稍歸和易

江上遇亦于大兄

白種愁回一寸腸更罹多難又他鄉與君一世為兄弟  
只是相逢在路旁

顧有孝 一首

有孝字茂倫吳江縣學生有雪灘釣叟集

請語處士甄綜百家之詩開雕分授盛行于時賓至輒留江左有壑菜  
孟嘗君之目由其胸無荻棘故月旦同辭晚自稱雪灘釣叟松陵女子  
沈關關刺繡作雪灘濯足圖一經  
裝池過江人士以不與題辭為恨

石湖曲

朝向石湖游暮向石湖游湖水明如鏡倒影橋外樓秋  
來一串月處處漾輕舟了自不相顧清光樓上頭

周 安 一首

安字安節吳江人有草閣集

顧茂倫云安節泊懷幽詣躡武宗雷清音琅琅不減

魚山仙梵 潘次耕云處士詩辭旨清遠不激不靡外淡而中腴蕭然絕俗

游道場山

透迤步崇岡奔迫下林麓至止歸雲亭秋花滿山屋修廊聳基階清池間松竹青雲停幽牕白鳥下喬木昔聞孫山人茅堂于此築高情屬雲天長嘯響巒谷一瓢常自挂采采東籬菊雲卧三十年遺墳傷榛曲再拜酌尊酒同調尚堪續逸氣振素襟清風來肅肅

文 柎 一首

柎字端文長洲人有慨菴詩選

訪邵僧彌

八寺遙瞻閣外松到門恰值午時鐘不知精舍看山色回到秋雲第幾峰

俞 粲 一首

粲字受子吳人隱居縹緲峰下自號洞庭農夫有芥菴集

舟行逢雪圃出山

昨夜舟中行月冷秋江口濛濛蘆荻花欲掃愁無帚寒山君忽遇共酌楓亭酒一鴈落長空帛書今在否君言懷袖無合在佳人手

湯祖祐 一首

祖祐字耿遥號桴莊吳縣人有五峰草堂集

道林菴看千年桂花傳係支公手植  
孤徑時獨行忽聞桂花發空香來無方境靜心自豁入  
寺訪幽蹤古樹千年活夕陽步踟躕含情不忍將

方其義

二首

其義字直之桐城人有時術堂集

黨禍

北都既陷賊南都新立帝宵人忽柄用朝野皆短氣魑  
魅登廟廷欲盡殺善類忤者立壘粉墉者動高位麒麟  
逢鉏商豺虎遂得勢手翻欽定案半壁肆羅織蕭邁反  
被誣趙鼎亦受詈直以門戶故忠邪竟倒置可憐士君  
子狼狽竄無地我家為世讎甘心何足異寃死不必悲

所悲在國事先帝兒難保我輩合當斃仰首視白日吞  
聲一灑淚

夜泊赤壁秉燭游之

秋雲黯澹愁荒野孤舟夜泊赤壁下江月不出行人稀  
四面棲鳥啼啞啞欲眠不眠重秉燭曳杖披衣駭童僕  
臨江把酒酌坡公獨飲一杯歌一曲曲終仰看天蒼涼  
清風颯颯吹衣裳武昌夏口在何處白波萬頃空茫茫  
此時星河亦錯落葦岸秋蛩鳴絡索登舟四顧夜無聊  
酒醒不見橫江鶴

薛

珩一首

珩字楚材吳縣人有研山藁



新嫁娘

有次應偷滴人前不敢彈縱  
冷郎愛惜猶恐事姑難

王

鐙一首

鐙字叔聞金壇人有病餘存草

馮衍

馮衍才華世絕倫時清主聖不容身  
江淹賦裏誰堪恨獨有關門對孺人

韓

畱一首

畱字石耕宛平人有天樵子集

詩話石耕善琴所操北音恥作妮妮兒女之語終身不娶游覽江湖以終今之牧犢子也五律清穩頗足名家

望天台

望裏天台近羣峰秀幾重迴看青嶂斷忽有白雲封  
絕壁垂樵徑春泥陷虎蹤石橋今夜月應為照長松

劉文焰一首

文焰字雪舫任丘人新樂忠恪侯文炳弟有攬

蕙堂偶存

稽山客懷

江東風景近如何十里錢塘倚櫂過  
白髮每從愁裏盡青山偏是客中多  
攢宮草沒冬青死禹廟碑傾古字磨  
獨有若邪溪畔女秋來猶唱舊吳歌

徐夜一首

夜初名元善字長公更字東癡濟南新城人

九日得顧寧人書約遊黃山

故國千年恨他鄉九日心山陵餘涕淚風雨罷登臨異  
縣傳書遠經時怨別深陶潛籬下意誰復繼高吟

張蓋 二首

蓋字覆輿一字命士永年人有集

詩話覆輿詩哀憤  
過情五言尤高簡

客中送人歸鄉

雲沒青山頂風含白岸波離情秋更苦歸路雨偏多小  
巷臨漳水荒林帶女蘿附書愁不達汝到定相過

同申鳧盟殷伯巖諸子集飲

屢宿陶潛宅今來得數公竹斜燈影外人醉雨聲中老

惜歡娛異交緣出處同病軀先就榻應怨鹿皮翁

費經虞 一首

經虞字仲若新繁人有雅倫

思蜀

垂老無家只自憐不堪往事益淒然春來更覺傷人意  
寒食青青麥滿田

車以遵 一首

以遵字孝思邵陵人有高霞堂詩集

蟋蟀

蟋蟀疏名異霜深在戶宜漸知牀下穩甘與草根辭暗  
雨聞遙夜明燈避小兒那能驚嬾婦秋士但增悲

張家珍 一首

家珍字璩子東莞人有寒木樓遺詩

哭馬

久失飛黃馬空餘血戰衣可憐橫草後不得裹尸歸力  
盡猶追逸功高幾潰圍年來生髀肉夢爾淚頻揮

屈翁山云璩子

年十六從其兄家玉身歷戎行騎黃馬摧鋒陷陣馬死璩子哭之慟葬之龍門山中既十年所忽夜夢馳馬如昔悲鳴躑躅覺而為詩弔之

潘章 三首

章字更生吳江人有力田餘橐

賦得梅影

移席苔陰古橫枝偃自如笛中吹不去松下埽仍疎近  
月孤香接當春積雪虛周遭三百樹入夢認吾廬

立秋

蕭瑟知秋早明河看兩星孤雲空外落一葉病中聽兔  
乍騰深窟鷓將嘯近垆鷹鷂宜順擊仗爾刷霜翎

荊卿

燕市悲涼擊筑翁更需何客入咸陽百金購得夫人匕  
不敵無且一藥囊

陳忱 一首

忱字遐心烏程人

閱羅隱詩

餘杭山水役精魂末世才人眼界昏憔悴感恩依尚父  
可憐尚父事朱溫

詩中稱錢鏐為尚父

祝洵文

一首

洵文字省老晚更名遁自號山臞海寧人補縣學生有影山樓詩集

夜集湯仁侯宅贈王元倩

故人相見倍相憐別去追思便十年亂後滄桑歡會少老年身世感傷偏婆娑枯樹今如此唱和清歌久不傳懷舊竹林餘向秀山陽鄰笛意淒然

談允謙

一首

允謙字長益丹徒人有樹護草堂集

聞內臣述往事

潛邸曾親到市廛民間物價每留連西華鵝炙前門鮓

一箸纔消半百錢

詩話崇禎初大官庖開應支物價簿帝詰內侍謂太浮且曰炙鵝醃鮓肉鮓在某肆市之錢半百耳內侍驚愕錄長益是詩足以徵思陵留心民事之一端也

祁班孫

三首

班孫字奕喜紹興山陰人都御史彪佳子有紫

芝軒橐

折楊柳辭

上馬不捉鞭但折楊柳枝出門不垂淚但歌楊柳辭

宮中樂

春到六宮齊花深輦路迷昭陽歌舞殿不許夜烏啼

寄朱子彞

日下江色寒雲山遠明滅高興憑層闌對景自怡悅方  
當怡悅間忽焉愁如結言念美人居隔此烟波闊烟波  
亦云遙思心差可越蕭蕭孤鴻飛肅肅寒風發鴻飛自  
往還風來無斷絕儻能挂雲帆乘此江上月

魏允桺

四首

允桺字交讓嘉善人孝子學伊子有維風集

野田黃雀行

百草被路衢春風揚其蕤本無歲寒姿青蔥會及時翩  
翩田中雀飛不出藩籬尉羅布四方投足多危機壯心  
而弱植感之良可悲鳳皇絕雲霓斥鷃亦笑之遨遊快  
適意大小安所知

有所思

佳人邈難見遠在天一方夢想觀音輝彷彿接容光文  
犀爲君門紫貝爲君堂珊瑚爲君枕玳瑁爲君牀駕言  
我所思山川淼以茫方舟雖利涉道遠不可航何以寄  
相思篋中雙明璫

早秋游北園

朱明駕云邁涼颼發新秋爰有同懷客招要出行遊修  
柯交密蔭嘉木翳崇丘時禽變好音雌雄鳴相求綺疏  
結長軒戶庭一何幽攜策登高岑揚舲眺中洲芳荷映  
綠池游魚激清流良苗亦懷風遠烟輕且浮爲樂未須  
臾白日忽已道弭節薄虞淵丹霞夾重樓聆彼蟋蟀唱

聿為良士謀賞心寄所宣使我忘百憂

古意

蕩子戍龍城倡樓月自明綺疏蟲網合碧瓦昔邪生萬里金微夢三更玉杵聲遙傳鏡吹入含笑下機迎

侯 澗 二首

澗字智含蘇州嘉定人有孝隱遺集

萬安

倦客猶高枕朝帆入五雲城外有五雲洲櫂歌隨曉定城鼓及春

聞白雨江灘合青山瘴雪分南康風物近猿鳥日為羣

春游

亭午風鳶盡出邨錫簫社鼓又黃昏獨愁看到冬青樹

寒食梨花早閉門

王廷璧 一首

廷璧字雙白武進人

五月望夜同夫山禪師翫月西湖

眾籟鳴蕭蕭微風來遠岑命儔理筇杖相將出青林輕舟漾花淑孤月明潭陰溯堤北垞去高閣當湖心沉沉水中景迢迢雲外音訪客不復值層軒恣憑臨眺望情彌愴曠然懷古今嘯詠匪任誕山川發高吟撫襟有餘慨靜言知所欽

及丹生 一首

丹生字彤寶一字山夫嘉善人

泊潤州

昨朝發毘陵今夜宿京口片月照高城寒鴉上衰柳

明詩綜卷八十

